

陝
縣
志

門 0089
函 610
號 4
冊 15

第 五 冊

人 物

40150.311
42

部三:5

楊
依
洪

楊依洪
章

陝縣志卷十七

歐陽珍編次

人物傳一

查舊誌人物傳太略於歷史有傳者每刪節取之而但存於藝文至本欄則但云有傳而已夫登載往哲之嘉言懿行所以表示將來使後人景仰而效法之乃志乘之實用茲故於歷代名人皆搜取原傳辭繁而不殺一以徵實為主若舊志於前清近代尤為顛倒錯亂今亦逐加更正均以科分先後為序至新採訪者各以類附焉庶便於觀覽云

夏

關龍逢陝人初桀觀炮烙於瑤臺謂龍逢曰樂乎龍逢曰人以為苦君以為樂臣觀君冠危石也臣觀君履春冰也未有冠危石而不壓履春冰而不陷者桀笑曰是日亡則與偕亡子知我之亡而不知自亡子就炮烙之刑吾觀之龍逢遂赴火而死見通志今墓在靈寶古函谷關原上

漢

韓孺陝人為任俠見史記游俠傳前漢書作寒孺

陝縣志

卷十七

成瑨字幼平宏農人少修仁義篤學以清名見舉孝廉拜郎中遷南陽太守郡舊多豪強中官黃門磐巨境界瑨下車振威嚴以檢攝之是時桓帝乳母中官貴人外親張子禁怙恃貴勢不畏法網功曹岑陞勸使捕子禁付宛獄笞殺之桓帝怒徵瑨下獄死初瑨到郡聞岑陞高名請為功曹委心於陞時人為之語曰南陽太守岑公孝岑陞字宏農成瑨但坐

嘯節錄後漢書黨錮傳

晉

董景道少嗜學千里從師慎交遊明春秋三傳京氏易馬氏尚書韓氏詩皆精徹不爽永嘉中知世將亂遂隱於商雒山劉曜時徵為太子少傅散騎常侍皆不就

楊騰景明初襲父爵華陰男為襄城太守政尚公平有聲稱累官開府儀同三司贈司空諡貞襄

馮遷為晉公護府司隸性質直小心畏慎明練時事善於決斷每閱簿書孜孜不倦甚見委任累遷小司空

唐

常達初仕隋為鷹擊郎將嘗從高祖征伐與宋老生戰霍邑軍敗自匿帝意已死久乃自

歸帝大悅命爲統軍拜隴州刺史時薛舉方強達敗其子仁臬斬首千餘級舉遣將仵士政給降達不疑厚加撫接士政伺隙劫之并其衆二千歸賊舉指其妻謂達曰識皇后乎答曰彼癯老嫗何所道舉奴張貴又曰亦識我否達噴目曰若乃奴耳貴忿舉笏擊其面達不爲懾亦拔刀逐之趙弘安爲蔽捍乃免仁臬平帝見達勞曰君忠節正可求之古人爲執士政殺之賜達布帛三百段以達並劉感事授史臣令狐德棻官終隴西刺史

唐書

忠義傳

上官儀字游韶陝州陝人父弘爲隋江都宮副監大業末爲陳稜所殺時儀幼左右匿免冒爲沙門服寢工詞涉貫墳典貞觀初擢進士第召授弘文館直學士遷秘書郎太宗每屬文遣儀視藁晏私未嘗不預轉起居郎高宗卽位爲秘書少監進西臺侍郎同東西臺三品時以雍州司士參軍韋絢爲殿中侍御史或疑非遷儀曰此野人語耳御史供奉赤墀下接武夔龍籛羽鷓鴣豈雍州判佐比乎時以爲清言儀工詩其詞綺錯婉媚及貴顯人多效之謂爲上官體麟德元年坐梁王忠事下獄死籍其家初武后得志遂牽制帝專威福帝不能堪又引道士行厭勝中人王伏勝發之帝因大怒將廢爲庶人召儀與議儀曰黃后專恣海內失望宜廢之以順人心帝使草詔左右奔告后后自申訴帝乃悔又恐

陝縣志

卷十七

二

后怨恚乃曰上官儀教我后由始深惡儀始忠爲陳王時儀爲諮議與王伏勝同府至是許敬宗構儀與忠謀大逆后志也自褚遂良等元老大臣相屠覆公卿莫敢正議獨儀納忠禍又不旋踵由是天下之政歸於后而帝拱手矣子庭芝歷周王府屬亦被殺庭芝女中宗時爲昭容追贈儀爲中書令秦州都督楚國公庭芝黃門侍郎岐州刺史天水郡公以禮改葬

新唐書列傳

姚懿字善懿崇父硤石人其先世吳興人以祖仕陝遂家焉隋末爲硤石縣令綏輯部曲以義應高祖貞觀中爲雋州都督贈幽州大都督吏部尙書諡文獻

姚崇字元之陝州硤石人父懿字善懿貞觀中爲雋州都督贈幽州大都督諡文獻崇少倜儻尙氣節長乃好學仕爲孝敬挽郎舉下筆成章授濮州司倉參軍五遷夏官郎中契丹擾河北兵檄叢進崇奏決若流武后賢之卽拜侍郎后嘗語左右往周興來俊臣等數治詔獄朝臣相逮引一切承反朕意其枉更畀近臣臨問皆得其手牒不冤朕無所疑卽可其奏自俊臣等誅遂無反者然則向論死得無冤邪崇曰自垂拱後被告者類自誣當是時以告言爲功故天下號曰羅織甚於漢之鉤黨雖陛下使近臣覆訊彼尙不自保敢一搖手以悖酷吏意哉且被問不承則重罹其慘如張虔勗李安靜等皆是也今賴天之

靈發寤陛下凶豎殲夷朝廷又安臣以一門百口保內外官無復反者陛下以告牒置弗推後若反有端臣請坐知而不告后悅曰前宰相務順可陷我爲淫刑主聞公之言乃得朕心賜銀千兩聖歷三年進同鳳閣鸞臺平章事遷鳳閣侍郎俄兼相王府長史以母老納政歸仕乃誥以相王府長史侍疾月餘復兼夏官尙書同鳳閣鸞臺三品崇建言臣事相王而夏官本兵臣非惜死恐不益王乃誥改春官張易之私有請於崇崇不納易之譖於后降司僕卿猶同鳳閣鸞臺三品出爲靈武道大總管張柬之等謀誅二張崇適自屯所還遂參計議以功封梁縣侯實封二百戶后遷上陽宮中宗率百官起居王公更相慶崇獨流涕東之等曰今豈涕泣時邪恐公禍由此始崇曰比與討逆不足以語功然事天后久違舊主而泣人臣終節也由此獲罪甘心焉俄爲亳州刺史後五王被害而崇獨免歷宋常越許四州睿宗立拜兵部尙書同中書門下三品進中書令玄宗在東宮太平公主干政宋王成器等分典閑廐禁兵崇與宋璟建請主就東都出諸王爲刺史以壹人心帝以謂主主怒太子懼上疏以崇等基間王室請加罪貶爲申州刺史移徐潞二州遷揚州長史政條簡肅人爲紀德于碑徙同州刺史先天二年玄宗講武新豐故事天子行幸牧守在三百里者得詣行在時帝亦密召崇崇至帝方獵渭濱卽召見帝曰公知獵乎對

陝縣志

卷十七

三

曰少所習也臣年二十居廣成澤以呼鷹逐獸爲樂張憬藏謂臣當位王佐無自棄故折節讀書遂待罪將相然少爲獵師老而猶能帝悅與俱馳逐緩速如旨帝歡甚旣罷乃咨天下事袞袞不知倦帝曰卿宜遂相朕崇知帝大度銳於治乃先設事以堅帝意卽陽不謝帝怪之崇因跪奏臣願以十事聞陛下度不可行臣敢辭帝曰試爲朕言之崇曰垂拱以來以峻法繩下臣願政先仁恕可乎朝廷覆師青海未有牽復之悔臣願不倖邊功可乎比來壬佞冒觸憲網皆得以寵自解臣願法行自近可乎后氏臨朝喉舌之任出閹人之口臣願宦豎不與政可乎戚里貢獻以自媚于上公卿方鎮寢亦爲之臣願租賦外一概絕之可乎外戚貴主更相用事班序荒雜臣願戚屬不任臺省可乎先朝褻狎大臣虧君臣之嚴臣願陛下接之以禮可乎燕飲融章月將以忠被罪自是諍臣沮折臣願羣臣皆得批逆鱗犯忌諱可乎武后造福先寺上皇造金仙玉真二觀費鉅百萬臣請絕道佛營造可乎漢以祿莽闔梁亂天下國家爲甚臣願推此鑒戒爲萬代法可乎帝曰朕能行之崇乃頓首謝翌日拜兵部尙書同中書門下三品封梁國公遷紫微令固辭實封乃停舊食賜新封百戶中宗時近戚奏度僧尼溫戶彊丁因避賦役至是崇建言佛不在外悟之於心行事利益使蒼生安穩是謂佛理烏用姦人以汨真教帝善之詔天下汰僧僞濫

髮而農者餘萬二千人崇嘗於帝前序次郎吏帝左右顧不主其語崇懼再三言之卒不答崇趨出內侍高力士曰陛下新即位宜與大臣裁可否今崇亟言陛下不應非虛懷納誨者帝曰我任崇以政大事吾當與決至用郎吏崇顧不能而重煩我邪崇聞乃安由是進賢退不肖而天下治開元四年山東大蝗民祭且拜坐視食苗不敢捕崇奏詩云秉彼螽蟊付畀炎火漢光武詔曰勉順時政勸督農桑去彼螟蟻以及螽蟊此除蝗誼也且蝗畏人易驅又田皆有主使自救其地必不憚勤請夜設火坎其旁且焚且瘞乃可盡古有討除不勝者特人不用命耳乃出御史爲捕蝗使分道殺蝗汴州刺史倪若水上言除天災者當以德昔劉聰除蝗不克而害愈甚拒御史不應命崇移書謂之曰聰僞主德不勝祇今祇不勝德古者良守蝗避其境謂修德可免彼將無德致然乎今坐視食苗忍而不救因以無年刺史其謂何若水懼乃縱捕得蝗十四萬石時議者喧嘩帝疑復以問崇對曰庸儒泥文不知變事固有違經而合道反道而適權者昔魏世山東蝗小忍不除至人相食後奏有蝗草木皆盡牛馬至相噉毛今飛蝗所在充滿加復蕃息且河南河北家無宿藏一不穫則流離安危繫之且討蝗縱不能盡不愈於養以遺患乎帝然之黃門監盧懷慎曰凡天災安可以人力制也且殺蟲多必戾和氣願公思之崇曰昔楚王吞蛭而厥

陝縣志

卷十七

四

疾瘳叔敖斷地福乃降今蝗幸可驅若縱之穀且盡如百姓何殺蟲救人禍歸於崇不以諛公也蝗害訖息於是帝方躬萬幾朝夕詢逮它宰相畏帝威決皆謙憚唯獨崇佐裁決故得專任崇第賒僻因近舍客廬會懷慎卒崇病疢移告凡大政事帝必令源乾曜就咨焉乾曜所奏善帝則曰是必崇畫之有不合則曰胡不問崇乾曜謝其未也乃已帝欲崇自近詔徙寓四方館日遣問食飲起居高醫尙食踵道崇以館局華大不敢居帝使語崇曰恨不處禁中此何避久之紫微史趙誨受夷人賂當死崇素親倚署奏營減帝不悅時曲赦京師惟誨不原崇惶懼上還宰政引宋璟自代乃以開府儀同三司罷政事帝將幸東都而太廟屋自壞帝問宰相宋璟蘇頌同對曰三年之喪未終不可以行幸壞壓之變天所以示教戒陛下宜停東巡修德以答至譴帝以問崇對曰臣聞隋取苻堅故殿以營廟而唐因之且山有朽壞乃崩况木積年而木自當蠹乎但壞與行會不緣行而壞且陛下以關中無年輸餉告勞因以幸東都所以爲人不爲己也百司已戒供擬既具請車駕如行期舊廟難復完盍奉神主舍太極殿更作新廟申誠奉大孝之德也帝曰卿言正契朕意賜絹二百匹詔所司如崇言天子遂東因詔五日一參入閣供奉八年授太子少保以疾不拜明年卒年七十二贈揚州大都督諡曰文貞十七年追贈太子太保崇析贖產

令諸子各有定分治令曰比見達官之裔多貧困至銖尺自競無論曲直均受蟻詆田宅水磴既共有之至相推倚以頓廢陸賈石苞古達者也亦先有定分以絕後爭昔楊震趙明盧植張奐咸以薄葬知真識去身貴速朽耳夫厚葬之家流于俗以奢靡爲孝令死者戮尸暴骸可不痛哉死者無知自同糞土豈煩奢葬使其有知神不在柩何用破費徇奢乎吾亡斂以常服四時衣各一稱性不喜冠衣毋以入墓紫衣玉帶足便於體今之佛經羅什所譯姚興與之對翻而興命不延國亦遂滅梁武帝身爲寺奴齊胡太后以六宮入道皆亡國殄家近孝和皇帝發使贖生太平公主武三思等度人造寺身嬰夷戮爲天下笑五帝之時父不喪子兄不哭弟致仁壽無凶短也下逮三王國祚延久其臣則彭祖老聃皆得長齡此時無佛豈抄經鑄像力邪緣死喪造經像以爲追福夫死者生之常古所不免彼經與像何所施然爾曹慎不得爲此崇尤長吏道處決無淹思三爲宰相常兼兵部故屯戍斥候士馬儲械無不諳記玄宗初立賓禮大臣故老稚尊遇崇每見便殿必爲之興去輒臨軒以送它相莫如也時承權戚干政之後綱紀大壞先天末宰相至十七人臺省要職不可數崇常先有司罷冗職修制度擇百官各當其材請無廣釋道無數移吏繇是天子責成於下而權歸於上矣然資權譎始爲同州張說以素憾諷趙彥昭劾崇及

陝縣志

卷十七

五

當國說懼潛詣岐王申款崇它日朝衆趨出崇曳踵爲有疾狀帝召問之對曰臣損足曰無甚痛乎曰臣心有憂痛不在足問以故曰岐王陛下愛弟張說輔臣而密乘車出入王家恐爲所誤故憂之於是出說相州魏知古崇所引及同列稍輕之出攝吏部尙書知東都選知古憾焉時崇二子在洛通賓客饋遺憑舊請託知古歸悉以聞他日帝召崇曰卿子才乎皆安在崇揣知帝意曰臣二子分司東都其爲人多欲而寡慎是必嘗以事干魏知古帝始以崇私其子或爲隱微以言動之及聞乃大喜問安從得之對曰知古臣所薦也臣子必謂其見德而請之帝於是愛崇不私而薄知古欲斥之崇曰臣子無狀撓陛下法而逐知古外必謂陛下私臣乃止然卒罷爲工部尙書始崇名元崇以與突厥叱刺同名武后時以字行至開元世避帝號更以今名三子彝昇弈皆至卿刺史

弈崇子少修謹始崇欲使不越官次而習知吏道故自右千牛進至太子舍人皆平遷開元中有事五陵有司以鷹犬從弈曰非禮也奏罷之請治劇爲睢陽太守召授太僕卿後爲尙書右丞子閔居右相牛仙客幕府仙客病甚閔強使薦弈及盧奐爲宰相仙客妻以聞閔坐死弈貶永陽太守卒曾孫合昂

合弈曾孫元和中進士及第調武功尉善詩世號姚武功遷監察御史累轉給事中奉先

馮翊二縣民訴牛羊使奪其田詔美原主簿朱儁覆按猥以田歸使合劾發其私以地還民歷陝虢觀察使終祕書監

昴字斯勤長慶初擢進士第數爲使府表辟進監察御史佐鹽鐵使務累諫議大夫更湖常二州刺史爲宰相李德裕厚善及德裕爲令狐綯等譖遂擿索支黨無敢通勞問旣居海上家無資病無湯劑昴數饋餉候問不傳時爲厚薄終夔王傳自作壽藏於萬安山南原崇塋之旁署兆曰寂居穴墳曰復真堂中剝土爲牀曰化臺而刻石告後世

張齊賢聖歷初爲太常奉禮郎遷博士中宗卽位因武后東都廟改爲唐廟議滿七室以涼武昭王爲始祖齊賢上議禮天子七廟尊始封君曰太祖百代不遷始祖無聞焉殷自元王至湯周后稷至武王皆出太祖後合食有序景皇帝始封唐實爲太祖以世數近故尙在昭穆今乃上引武昭王爲始祖異乎殷周之本契同稷也高稷興祚景皇帝是也昭王國不世傳後嗣失守景皇帝實始封唐子孫是承若近舍唐遠引涼不見其可且魏不祖曹參晉不祖司馬卽宋不祖楚元王齊梁不祖蕭何陳隋不祖胡公楊震今謂昭王爲祖可乎漢以周郊后稷議欲郊堯杜林以爲周興自后稷漢業特起功不緣堯卒不果郊武德初定去昭王尤近不託祖者不可故也今而立之非祖宗意景皇失位神弗臨享殆

陝縣志

卷十七

六

非貽厥孫謀者博士劉成慶尹知章又言受命之君王迹有淺深代系有遠邇祖以功昭穆以親有功者不遷親盡者毀今不宜以廟數未備引當遷之王于穆上苟充七室也景皇帝卽號太祖以世淺猶在六室位在室未當有七非天子不當七也大帝神主旣耐宣皇帝當遷宣非始祖又無宗號親盡而遷不可復立請仍爲六室詔宰相詳裁於是祝欽明等上言博士等三百人爲兩說齊賢不祖武昭王劉承慶等請遷宣皇帝臣等欲皆可其奏詔可俄以孝敬皇帝爲義宗列於廟爲七室西京太廟亦如之齊賢累遷諫議大夫卒

張象登進士第玄宗時楊國忠爲右相勢傾一時象不肯見或勸曰見之富貴立可圖象曰君輩依右相爲泰山吾以爲冰山耳皎日一出君輩得無失所恃乎遂隱居嵩山姚巖傑崇裔孫以詩酒放游江左著有象溪子二十卷

獨孤信特達高才爲河南刺史有惠政

陸辰字詳文宰相贄族孫客於陝州遂爲陝人光啟二年從僖宗幸山南擢進士第累進翰林學士中書舍人辰工屬辭敏速如注射然一時書命同僚自以爲不及昭宗優遇之帝嘗作賦詔學士皆和之獨辰最先就帝覽之嘆曰貞元時陸贄吳通元兄弟善內庭文

書後無繼者今朕得之始得舉進士時方遷幸而六月勝出至是每甚暑它學士輒戲曰造勝天也以譏辰進非其時累爲尙書左丞封嘉興縣男徙戶部侍郎同中書門下平章事故事自三省得宰相有光署錢留爲宴資學士院未始有至辰送光院錢五十萬以榮近司進中書侍郎判戶部事久之授工部尙書從天子自華州還以兵部尙書復當國封吳郡公又累兼戶部尙書帝至自鳳翔大赦天下諸道皆賜詔獨不及李茂貞辰曰國西鳳翔爲最近迹其罪固不可赦然尙修職貢朝廷未之遽絕無於詔書有異也始崔允罷相辰代之允內怨望及是議以爲有黨附貶沂王傅分司東都允死復授吏部尙書從遷洛柳璨始附朱全忠謀去朝廷衣冠有望者貶辰濮州司戶參軍殺之白馬驛

五代

高季興字貽孫硤石人也本名季昌避後唐獻皇廟諱更名季興季興少爲汴州富人李讓家僮梁太祖初鎮宣武讓以入貴得幸養爲子易其始名曰朱友讓季興以友讓故得進太祖奇其材命友讓以子畜之冒姓朱氏補制勝軍使遷毅勇指揮使天復二年梁兵攻鳳翔李茂貞堅壁不出太祖意欲收軍還河南季興獨進曰天下豪傑窺此舉者一歲矣今岐人已憊破在旦夕而大王之所慮者閉壁以老我師此可以誘致之也太祖壯其

陝縣志

卷十七

七

言命季興募勇敢士馬景季興授以計引見太祖景曰此行無還理願錄其後嗣太祖惻然止之景固請乃行景以數騎馳叩城門告曰梁兵將東前鋒去矣岐人以爲然開門出追梁軍梁兵隨景後以進殺其士卒九千餘人景死之茂貞後與梁和昭宗出贈景官諡曰忠壯季興由是知名明年拜宋州刺史從破青州徙潁州防禦使復姓高氏當唐之末襄州趙匡凝襲破雷彥恭於荆南以其弟匡明爲留後梁兵攻破襄州匡凝奔於吳匡明奔於蜀乃以季興爲荆南節度觀察留後開平元年拜季興節度使二年加同中書門下平章事荆南節度十州當唐之末爲諸道所侵季興始至江陵一城而已兵火之後井邑凋零季興招緝綏撫人士歸之季興見梁日以衰弱乃謀阻兵自固治城隍設樓櫓絕貢賦累年梁末帝優容之封季興渤海王賜以袞冕劍佩梁亡唐莊宗入洛下詔慰諭季興司空薰等皆勸季興入朝京師梁震以爲不可曰梁唐世爲仇敵夾河血戰垂二十年今主上新滅梁而大王梁室故臣握強兵居重鎮以身入朝行爲虜爾季興不聽留其二子以騎士三百爲衛朝於洛陽莊宗果欲留之郭崇韜諫曰唐新破梁得天下方以大信示人今四方諸侯相繼入貢不過遣子弟將吏而季興以身述職爲諸侯率宜加恩禮以諷動來者而反糜之示天下以不廣且絕四方內向之意不可莊宗乃止厚禮而遣之莊宗

嘗問季興曰吾已滅梁欲征吳蜀何者爲先季興曰宜先蜀臣請以本道兵先進莊宗大悅以手拊其背季興因命工繡其手迹於衣歸以爲榮耀季興已去莊宗心悔遣之密詔襄州劉訓圖之季興行至襄州心動夜斬關而出已去而詔書夜至季興歸而謂梁震曰不聽子言幾不免吾行有二失來朝一失放還一失且主上百戰以取河南對功臣誇手鈔春秋又曰我於手指上得天下其自矜伐如此而荒於遊畋政事多廢吾可無慮矣同光三年封南平王魏王繼岌已破蜀得蜀金帛四十餘萬自峽而下而莊宗之難作季興聞京師有變乃悉邀留蜀物而殺其使者韓瑛等十餘人初唐兵伐蜀季興請以本道兵自取夔忠萬歸峽等乃以季興爲峽路東南面招討使而季興未嘗出兵魏王已破蜀而明宗入立季興因請夔忠等州爲屬郡唐大臣以爲季興請自取之而兵出無功不與季興屢請雖不得已與之而唐猶自除刺史季興拒而不納明宗乃以襄州劉訓爲招討使攻之不克而唐別將西方鄴克其夔忠萬三州季興遂以荆歸峽三州臣於吳吳册季興秦王天成三年冬卒年七十一諡曰武信季興子九人長子從誨立季興自梁開平元年鎮荆南至宋乾德元年國除子孫相繼爲王凡五十七年

五代史南平王世家

從誨初仕梁歷殿前控鶴督頭鞍轡庫副使左軍巡使如京使左千牛大將軍荆南衙內

陝縣志

卷十七

八

都指揮使領濠州刺史改歸州刺史累官至檢校太傅初季興之將叛也從誨常泣諫之季興不從天成三年冬季興薨從誨乃上表謝罪復修職貢明宗嘉之尋命起復授荆南節度使兼侍中長興三年加檢校太尉應順中封南平王清泰初加檢校太師晉天福中加守中書令六年襄州安從進反王師攻討從誨饋軍食以助焉詔書褒美尋加守尙書令從誨上章固讓朝廷遣使敦勉竟不受其命時有術士言從誨年命有厄宜退避寵祿故也及契丹入汴漢高祖起義於太原間道遣使奉貢密有祈請言俟車駕定河汴願賜鄧州爲屬郡漢祖依違之及入汴從誨致貢求踐前言漢高祖不從從誨怒率州兵攻鄧州旬日爲刺史尹實所敗自是朝貢不至從誨東通於吳西通於蜀皆利其供軍財貨而已末年以鎮星在翼軫之分乃釋羅紈衣布素飲食節儉以禳災咎尋令人祈託襄州安審琦請歸朝待罪朝廷亦開納之漢乾祐元年冬十一月以疾薨於位詔贈尙書令諡曰文獻子保融嗣位至荆南節度使守太傅中書令封南平王皇朝建隆元年秋卒諡曰貞懿

保勗季興之幼子也鍾愛尤甚季興在世時或因事盛怒左右不敢竊視惟保勗一見季興則怒自解故荆人目之爲萬事休皇朝建隆四年春卒是歲荆門之地不爲高氏所有

則萬事休之言蓋先兆也

舊五代史

景延廣字航川陝州人也父建累贈太尉延廣少習射以挽強見稱梁開平中邵王朱友誨節制於陝召至麾下友誨坐謀亂延廣竄而獲免後事華州連帥尹皓皓引薦列校隸於汴軍從王彥章拒莊宗於河上及中都之敗彥章見擒而延廣被數創歸於汴唐天成中明宗幸夷門會朱守殷拒命尋平之延廣以軍校連坐將棄市高祖時爲六軍副使掌其事見而惜之乃密遣遁去尋收爲客將及張敬達之圍晉陽高祖付以戎事甚有干城之功高祖卽位授侍衛步軍都指揮使檢校司徒遙領果州團練使轉檢校太保領夔州節度使四年出鎮滑臺五年加檢校太傅移鎮陝府六年召爲侍衛馬步都虞侯移鎮河陽七年轉侍衛親軍都指揮使檢校太尉其年夏高祖晏駕延廣與宰臣馮道等承顧命以少帝爲嗣既發喪都人不得偶語百官赴臨未及內門皆令下馬由是有驕暴之失少帝既嗣位延廣獨以爲己功尋加同平章事彌有矜伐之色朝廷遣使告哀契丹無表致書去臣稱孫契丹怒遣使來讓延廣乃奏令契丹迴國使喬榮契丹國志先是河陽牙將喬榮從趙延壽入遼遼帝以爲回國使置邸大梁至是景延廣說帝囚榮於獄凡遼國販易在晉境者皆殺之奪其貨大臣皆言遼國不可負乃釋榮慰賜而歸之告契丹曰先帝則北朝所立今上則中國自策爲鄰爲孫則可無臣之理且言晉朝有十萬口橫磨劍翁若要

陝縣志

卷十七

九

戰則早來他日不禁孫子則取笑天下當成後悔矣由是與契丹立敵于戈日尋初高祖在位時嘗借楊光遠騎兵數百延廣請下詔遣還光遠由此忿延廣怨朝廷遣使汎海構釁天福八年十二月契丹乃南牧九年正月陷甘陵河北儲蓄悉在其郡少帝大駭親帥六師進駐澶淵延廣爲上將凡六師進退皆出胷臆少帝亦不能制衆咸憚而忌之契丹既至城下使人宣言曰景延廣喚我來相殺何不急戰一日高行周與番軍相遇于近郊以衆寡不敵急請濟師延廣勒兵不出是日行周幸而獲免及契丹退延廣猶閉柵自固士大夫曰昔與契丹絕好言何勇也今契丹至若是氣何憊也時延廣在軍母凶問至自澶淵津北移于津南不信宿而復莅戎事曾無戚容下俚之士亦聞而惡之時有太常丞王緒者因使德州迴與延廣有隙因誣奏與楊光遠通謀遣吏繫于麾下鍛成其事判官盧億累勸解不從尋有詔棄市時甚冤之少帝還京嘗幸其第進獻錫賚有加酬酢權寵恩渥爲一朝之冠俄與宰臣桑維翰不協少帝亦憚其難制遂罷兵權出爲洛都留守兼侍中由是鬱鬱不得志亦意契丹強盛國家不濟身將危矣但縱長夜飲無復以夾輔爲意宋史盧多遜傳父億景延廣鎮天平表億掌書記留守西洛又爲判官時國用窘乏取民財以助軍河南府計出二十萬緡延廣欲並緣以圖羨利增爲三十七萬緡億諫曰公位兼將相既富且貴今國帑空竭不得已而取費于民公何忍利之乎延廣慚而止開運三年冬契丹渡滹水詔遣屯孟津將戒

途由府署正門而出所乘馬騰立不進幾墜于地乃易乘而行時以爲不祥之甚及王師降契丹延廣狼狽而還時契丹主至安陽遣別部隊長率騎士數千與晉兵相雜趨河橋入洛以取延廣戒曰如延廣奔吳走蜀便道追而致之時延廣顧慮其家未能引決契丹既奄至乃與從事閻丕輕騎謁契丹主于封邱與丕俱見繫焉遼史將軍康祥執景延廣來獻延廣曰不臣之從事也以職相隨何罪而亦爲縲囚契丹釋之因責延廣曰致南北失歡良由爾也乃召喬榮質證前事凡有十焉始榮將入蕃時給延廣云某恐忽忘所達之語請紀于翰墨延廣信之乃命吏備記其事榮亦儉巧善事人者也慮他日見詰則執之以取信因匿其文于衣中至是延廣始以他語抗對榮乃出其文以質之延廣頓爲所屈每服一事則受牙籌一莖此契丹法也延廣受至八莖但以面伏地契丹遂咄之命鑱延廣臂將送之北土是日至于陳橋民家草舍延廣懼燔灼之害至夜分伺守者怠則引手自扼其吭尋卒焉雖事已窮頓人亦壯之時年五十六東都事略管居潤嘗爲樞密院小吏景延廣留守西京補爲右職契丹犯京師以兵圍延廣家故吏悉避去居潤爲全護其家時論稱之漢高祖登極詔贈中書令延廣少時嘗泛洞庭湖中流阻風帆裂桅折衆大懼頃之舟人指波中曰賢聖來護此必有貴人矣尋獲濟焉竟位至將相非偶然也

陝縣志

卷十七

十

論曰歐陽公謂晉氏之事維翰成之延廣壞之其新五代史景延廣傳極敘其驕泰假蹇之狀幾無一長可取者噫延廣固非純臣然當其致書契丹抗不稱臣其志意未可厚非也特不能好謀善備而徒恃囂張之氣鹵莽一逞終歸於覆敗耳今政府方圖制敵而上下訓練期於萬衆一心保固金湯亦須得卓然不羣目無強鄰者爲之倡首皆如延廣之十萬橫磨劍以激勵士夫而濟之以穩健整暇庶可以自強矣故取舊五代史傳其瑕瑜原不相掩而推論之如此

宋

高擇字文悅荆南高季興四世孫幼孤養於外家十三歲能屬文通經史百家之書聞種放隱終南山乃築室豹林谷從放受業放奇之不敢處以弟子之行與同時張蕘許勃號南山三友會詔舉沉淪草澤知長安寇準聞其名薦之辭不起景祐中錄國初侯王後擇推其弟忻得官及范雍建京兆府學召擇講授諸生席間嘗數十百人杜衍嘗請賜處士號乃命爲大理評事擇固辭仁宗嘉其守號安素處士詔州縣歲時禮遇之給良田五百畝文彥博表其經術該通有高世之行可以勵風俗詔賜第一區嘉祐中就除光祿寺丞復固辭夢道士持素書聘爲白鹿洞主卒

宋史隱逸傳

魏野世爲農母嘗夢引袂於月中承兔得之因有娠遂生野及長嗜吟咏不求聞達居州之東郊手植竹樹清泉環遶旁對雲山景趣幽絕鑿土袤丈曰樂天洞前爲草堂彈琴其中好事者多載酒肴從之遊嘯咏終日前後郡守雖武臣舊相皆加禮遇或親造詣趙昌言性尤促傲特置賓次戒閹吏野至卽報野不喜巾幘無貴賤皆紗帽白衣以見出則跨白驢過客居士往來留題會話累宿而去野爲詩精苦有唐人風格多警策句有草堂集十卷大中祥符初契丹使至嘗言本國得其上帙願求全部詔與之祀汾陰歲與洛陽李瀆並被薦遣陝令王希招之野上言曰陛下告成天地延聘巖藪臣實愚癡忝性庸拙幸逢聖世獲安故里早樂吟咏實非風騷豈意天慈曲垂搜引但以管嬰心疾尤疎禮節麋鹿之性頓纓則狂豈可瞻對殿墀仰奉清燕望回過聽許令愚守則吠畝之間永荷帝力詔州縣長吏常加存撫又遣使圖其所居觀之五年四月復遣內侍存問天禧三年十二月無疾而卒年六十州上其狀四年正月詔曰國家舉旌賞之命以輝丘園申卹贈之恩用慰泉壤所以褒逸民而厚風俗也故陝州處士魏野服膺儒素刻意篇章顧詞格之清新爲士流之推重而能篤淳古之行慕肥遯之風頃屬時巡嘗加聘召懇陳誠志願遂考槃及此淪亡載深嗟悼蘭臺清秩追飾幽扃厚其賻助之資寬以復除之命諒惟優禮式

陝縣志

卷十七

十一

顯令名魂而有知歎此殊渥可特贈祕書省著作郎賻其家帛二十四匹米三十斛州縣常加存卹二稅外免其差徭瀆卽野中表兄也瀆卒訃至野哭之慟謂其子曰吾不可去去必不至第遣其子弔之裁六日而野亦卒時共異焉

閑字雲夫野之子少喜爲詩學鼓琴不樂仕進皇祐二年仁宗祀明堂詔求遺逸草萊年耆德茂者直史館李昭遣薦閑再世有高節上嘉之賜號清逸處士

韓川字元伯進士上第歷開封府推官元祐初用劉摯薦爲監察御史極論市易之害以爲名曰平均物直而其實不免貨交以取利就使有獲尙不可爲况所獲不如所亡果何事也願量留官吏與之期使趣罷此法從之遷殿中侍御史疏言朝廷於人才常欲推至公以博采及其弊也則幾於利權勢而抑孤寒常欲收勤績以赴用要其終也則莫不收虛名而廢實効也近制太中大夫以上歲舉守臣遇大州闕則選諸所表其他雖考課上等皆得預推原志意固欲得人然所謂太中大夫以上率在京師諸馳騫請求者得之爲易至於淹歷郡縣治狀應法者顧出其下則是謹身修潔之人不若營求一章之速化也於是詔吏部更立法張舜民論西夏事乞停封册朝廷以爲開邊隙罷其御史梁燾張舜民爭之川與呂陶上官均謂舜民之言實不可行燾等去川亦改大常少卿不拜加集賢

校理知潁州進爲侍御史樞密都承旨進中書舍人吏禮二部侍郎以龍圖閣待制復守潁徙虢州與孫升同受責由坊州貶屯田員外郎分司岷州團練副使道州安置徽宗立得故官知青襄二州卒

元

岳藏齋幼篤志勤學丞相史天澤征西過其第訪以治體齋具陳方略天澤以聞授樞密經歷遷內臺御史調河南總管終國子監祭酒

明

石璞好讀書不事華靡以吟咏自娛樂洪武中以儒士薦累官戶部侍郎

王瓘字廷用景泰甲戌進士初授戶部清吏司主事升郎中歷山西布政司參議以廉惠擢陝西參政任事清勤固原土達滿四據石城叛大爲平涼漢中患都御史項忠督軍討之御史馬文升爲副六路進兵瓘督六路餉供軍滿四就擒進四川布政司未之任告歸任所祀名宦陝祀鄉賢

蕭瑛景泰丙子舉人大名教授署聞喜教諭聞喜舊乏科第瑛遴其英俊剖析經義嚴立課程文風大洽科名日盛卒後宦遊過陝者胥弔墓式廬焉

陝縣志

卷十七

十二

趙文才識俊偉事親以孝聞天順丁丑進士試場不戒於火文獨不遇災人以爲孝友所致授考功司主事轉員外不受請託忤朝貴引休居林下三十年以詩酒自娛卒祀鄉賢白繩武天順壬午舉人性戇直事親孝任魏縣知縣勸農防水屢反疑獄人稱明斷竟以直道不令告歸自號樵澗老人年九旬卒祀鄉賢

陳雲遠舉人見稱於薛瑄再傳弟子渭南薛敬之成化時秦州周憲宗薛瑄之學爲一代宿儒渭南薛敬之從蕙遊設座跪而請教嘗語人曰周先生躬行孝弟學近伊洛吾以爲師陝州陳雲遠忠信狷介事必持敬吾以爲友

見明史儒林傳

張九功博學負氣節登成化戊戌進士授翰林庶吉士改禮科給事中歷吏科都給事論列三十餘疏皆國家大體論孔廟從祀當黜荀况進薛瑄他如崇本卹民救災儲蓄防患抑貪等奏皆剴切可施行擢太僕卿又條列馬政深切時務卒於官遣官諭祭祀鄉賢

趙全成化丁未進士初任安陸州以清勤聞時賦役煩重全規畫有方無不就緒升南京刑部員外郎中尋遷鄖陽知府大著政聲以逆奄劉瑾擅權告歸安陸鄖陽志稱其有古循吏風祀名宦陝祀鄉賢

張玉成化甲午舉人任山陽令時境內有火災禱之卽息後任行唐天苦嘆行唐不爲災

引年歸子建昌主簿軫生員輒成壽九十有司扁其門曰六朝人瑞

孫清成化甲午舉人官汶上教諭鼓勵學風士有貧不能讀者給饗殮膏火一時寒士賴其力登科甲者甚衆後都御史路君楷知府于君恩過陝皆祭其墓爲之樹碑

陳恂宏治壬子舉人任廣平教諭時劉齊叛大中丞舉儒將統大名府民兵恂慨然請行論功賜綵緞升南和知縣調榆次考績稱最旌曰做官都怕榆次今民却服陳恂累遷按察使簽事苑馬寺少卿進階正卿

孫昌宏治丁卯舉人性質樸以古道自期任武功令布衣疏食愛民如子致仕歸薄田茅舍如村翁稱廉仕者莫能尙云

王卿家貧力學兄弟以戴禮相授受初宰德平調上海邑富甲東南卿一介不取升戶部主司去任時民爲立碑行李數篋舉之輕若槁葉監滸墅關鈔歲積羨餘萬計悉歸諸官歷參浙藩聞弟言訃上疏乞骸歸里

王言弱冠登正德戊辰進士第授刑曹斷獄如老吏知順德府以清勤聞民爲立生祠調大名山東憲副時黃河潰決言馳往巡視以勞致疾卒

張梅性聰慧少孤從學於高郵學正馬文年未弱冠膺嘉靖壬午鄉薦爲新安尹縣密邇

陝縣志

卷十七

十三

京畿多中貴撓權梅以公濟明以明濟威民大悅服擢南京四川道御史糾論官慝直聲凜然

何應奇萬歷癸未進士授工部主司遷員外郎管臨清磚廠督繕得法抑僥倖裁冗糜積羨餘以萬計歷郎中山西簽事備兵鴈門分守口北嚴禁剝削得士卒心尋謝歸著有詩學精義淵源

崔岩嘉靖壬子經魁任山陽令士民愛戴於縣治東建去思亭卒後楊公瑞輓詩有山陽一片石萬古未應磨之句

張應旂歲薦貳莒州凡利害悉愆慮長吏興除之數代行守事益得展布民爲立生祠尸祝升南都兵馬禁奸緝盜風聲凜然卒於官貧無以殮士民賻助之始得歸葬子敏政敏行先後俱明經

趙廷輔字對峯故陝州人居熊耳山側西馬村萬歷初元歲薦初宦罄屋訓導升永壽教諭性耿介篤孝友故其教兩地士後文藝先準繩兩地士亦多恂恂雅化旣歸不入城市有司徵鄉飲不赴癸未聞王以悟講學伊洛之間遣子良棟良桂從遊比歸省輒喜曰吾兒聞正學得所依歸吾德盡矣戊子孟雲浦家居廷輔年七十神氣不減壯歲猶往來於

嶠澗間引二子求爲引證旋而集姻黨及族屬聯會聚講昕夕觀摩二子學益進遠近多悅從之者於戊戌三月卒

高天命萬歷戊子舉人諭陳留應聘較楚試所得皆名士宰安定善政不可枚舉白薛吏冤其著者擢永甯知州公廉峻厲中飛語罷歸與兄分居因舊居患水輒以新營者讓之孝友蓋天性云

趙完璧萬歷丙戌進士生而沉毅博極羣書爲文高邁不作餽釘語尤工鐘王書法筮仕掖縣調河間給耕牛開荒田關心民瘼擢禮科給諫轉吏科都諫屢疏請建儲貳停開捐名重一時升太常寺少卿以疾卒於官仕官十餘年田宅無少增益著有秋窗漫錄等書祀鄉賢

衛天命萬歷戊子舉人事父母先意承志親沒葬祭悉如禮令武功有惠政以疾乞歸月餘卒生平不通竿牘守先人田數畝屋數椽性慤飭未嘗聚徒講學人稱躬行君子

衛三省萬歷己丑進士宰深澤三月調邯鄲丁艱歸起補掖縣有惠政民爲建生祠歷戶部主太倉羨贏不染及督餉金城京運愆期三省籌借鉅款以給擢山東參政奏最封贈三代升陝西按察使未之任而卒著有易經正解

陝縣志

卷十七

十四

王以悟字惺所萬歷甲辰進士授邢臺令陞兵部主事歷官山西參政童時聞孟雲浦之賢卽裹糧求爲弟子誠苦備至旣而引見尤西川喜謂得人曰王生其貌日休休耳其氣日充充耳其心日空空耳旣成進士澹泊若寒素在邢臺刻復古諭俗諭士諸約適邢大饑條上利病二十事設粥廠置綿衣以振貧民雖窮鄉山坡必躬親嚴稽民沾實惠又以俸錢代贖鬻妻子者分校順天鄉試鹿忠節善繼出其門舉卓異擢兵曹感時事請罷內市嚴禁衛杜異端皆關切大政不報時有闕門毆御史者具疏論遣置鼎新會與士大夫論學天啟元年出參山西政單車就道行李蕭然甫三月卽告歸知世將亂隱居不出與同里崔儒秀有故知爲忠義士而深交之儒秀以開原兵備事隨袁經略應泰守遼東及遼陽失陷以悟聞之嘆曰傲初死矣儒秀字傲初已而儒秀果以死節聞是時流寇竄陝以悟令鄉民築寨自衛教以守禦之法賊攻之數日不克遂引去鄉人賴以免劫難者甚衆以壽卒於家陝人於城內建專祠以祀之著有常惺惺所稿初以悟自山西冀寧道謝病歸與張抱初張春宇呂豫石諸人倡明師說一時學者多向風適河東饑使李緝敬名曰直江西吉人巡歷過陝與以悟講學於蕭寺旋爲葺依仁書院爲以悟講學之地以悟爲陽明之學以良知爲宗旨時關中馮恭定公名從吾被劾歸過陝與以悟講學不能契蓋同學姚江而

微有不同也洛學編載其論學之言曰自道學不明世往往薄躬行爲無奇其上者溺情訓詁藉口翼道其下者以文人援玄虛要妙之說自列於儒林此皆吾道之蠹耳夫躬行豈易言哉終身體之不能盡堯舜之猶病文之望道未見孔子之何有未能皆學不能盡處又與張抱初論學詩云自昔由來說克艱立心只在危微間男兒事業參天地合下先須透此關又云終日紛紛何所求幾人知向此中修孩提一念通天地翻棄寶山學比丘嘗曰須迴顧此擔子如何擔究竟如何結果歲月不多恐碌碌過去可以見其大凡矣劉論性孝友素孤介以歲薦任中牟訓導遷襄城教諭皆以行詣鑄士及歸里施藥活人壽九十終

劉誥以明經授光山縣訓導升環縣教諭造士有方兩地欽其師範歸里課耕教子足不履公門有古君子風焉

衛濬天啟辛酉舉人除山東濟南府馬政通判時地方多事整頓城坊賴濬以濟題爲參軍同知

任賢以明經任壽州同知躬親勸農遇旱蝗祈禱輒應及歸吏民思之

任誨以明經任淄川訓導士有貧者割俸以濟有執贖者輒卻不受及引休士爭繪像以

陝縣志

卷十七

十五

志思

王秉直以明經任臨清訓導得士心年九十七終

董獻策以明經歷任漢陽通判有能聲

楊三錫以明經任裕州訓導秉性豁達恤友之貧宥人之過有長者風

韓養豫以恩貢任唐山縣知縣賦性謹厚政有善聲

清

張天翼順治戊戌進士任湖廣江陵令值西山寇擾大兵雲集事辦而民不擾時稱有循吏風

王得自以悟孫事繼祖母田氏繼母楊氏以孝聞時中原初定以優行授靈寶令署丞事有惠政

韓論州城內人康熙丙午舉人授安徽睢甯知縣時地方多故論布置有方官民兩便以疾去鄉民攀轅臥轍挽留者甚衆在籍捐貲修城襄辦善舉鄉人德之入彰善坊

孫洪祖歲貢生守正力學博涉經史明末寇陷陝州肆擄掠洪祖攜前代積書避城外家財一空不恤也康熙十四年任西華訓導課士多所成就先是家居倡修文廟及硤石山

路又以兵燹後州志蕩然洪祖網羅舊聞考訂得失輯爲成書分陝文獻賴以不墜
劉蘭由拔貢任南康通判時訛言賊抵城下蘭獨鎮靜令民無驚擾後竟無事歷監兌漕
務軍民相安後致仕聘鄉飲大賓

張鷟康熙乙未進士甘淡泊嚴操守事所後父母得其歡心友愛昆弟淹通經史尤邃於
易仕古浪令舊屬衛所時新改爲縣察土俗民情政簡而寬邑人勒碑志之祀古浪名宦
祠

張鷟康熙庚子舉人任江南蕪湖令調霍邱並有惠政致仕歸修廣濟渠建學使行臺皆
竭力爲州人倡著有四書精解雞足山詩集道善堂文集

燕臣仁州城內人雍正戊戌進士授山東臨邑知縣廉潔自守多惠政卒任所貧無以歸
臨邑士庶歛財泣送者數百人

王行言由歲貢授甯陵訓導旋里後舉鄉飲大賓好施與篤於戚族四世同居當事表其
閭入彰善坊

張愈聚字萃升號川南先世隸北平長垣明初有諱英者以從龍功襲宏農衛武德將軍
因家焉大父鷟從兄愈暄以儒行重當時愈聚初誕父萬紀夢三星聚而爲一因以命名

陝縣志

卷十七

十六

少好學能文年二十二補博士弟子員旋領鄉薦後八年棟發益州以知縣試用旋以憂
去服闋例仍赴川省時金酋不靖大兵進勦川中鼎沸人方難之愈聚慨然曰吾人服古
入官豈徒於無事時享高爵厚祿哉遂馳赴軍營司鑄炮局悉心經營所布置皆井井有
條時炮爐土運自內地民夫數百勞費不支一日徒步山僻中得白土一區藉以鑄炮民
得休息省帑餉無算臬司李世傑遂深相器重事竣得補石泉令泉邑爲川省僻壤民鮮
知書又街市寥落交易維艱愈聚爲設都會建鄉塾以故民有餘財人知自勵六年之中
浸浸有富庶風爲政猛以濟寬故囑匪滋事獨不敢入縣境尤慎於聽訟案無留獄事無
鉅細訊決後人咸稱神明歷署榮縣梁山岳池皆藉藉有聲尋擢知茂州旋調新疆總理
懋功屯軍餉懋功屯者故金川地也新隸版圖番夷雜處稍不如意輒攻擊相賊殺以故
官斯土者常有朝不保夕之虞愈聚撫之以恩鎮之以靜遂皆安堵三年考滿除浙江嚴
州守將行適廓爾格滋事調及番兵諸憲以愈聚恩信素著蠻夷委出口監軍餉愈聚不
辭勞瘁及抵口外番衆咸踴躍奮勵事竣始往嚴甫下車豪惡屏跡間有潛畜妓娼恣爲
不法者皆洗心革面而不敢爲非性嗜書公餘輒課士所甄拔多得人在嚴七載尋護理
金衢嚴道篆越一載入覲奏對皆稱旨擬大用南旋後偶失調攝抵署十餘日竟不起時

嘉慶庚申二月十四日也享年六十有四子四阮文達公元銘其墓極為推許云

張長庚會興鎮人少機警善應對以歲貢生於乾隆四十一年協助川運議敘知府歷任廣平平越等府知府升湖北漢黃德道旋超升布政使戊午科武闈典試遷山東按察使奉命征勦川楚教匪辦理湖北軍務卽補按察使調貴州按察使署布政使兼貴州巡撫誥授通議大夫賞戴花翎累賜蟒緞翠玉搬指貂皮大小荷包等物並珍食多次皆異數也長庚所在皆有能名尤以任湖北時多惠政武昌爲建生祠以祀之先是長庚以貴州布政使初兼巡撫時所接前任移文庫存公款巨萬金未認真盤查後啟庫空空以此獲罪籍其家時人多冤之

從會興鎮張氏族譜採錄

李樾乾隆壬午舉人丁外艱廬墓三年有烏百餘夜棲墓所人以爲孝思所感壽八十有九無疾而逝

燕增元臣仁侄乾隆己丑進士授浙江麗水知縣賦行端方不受苞苴直捐廉增麗水書院膏火麗水文風賴以稱盛

兀南薰字虛絃號映山劉司直高第弟子也初入太學從漳浦蔡世遠遊始究心聖賢之學後以親老不能遠離乃從司直受學親卒廬墓三年居喪儀節備書諸紳用以自箴家

陝縣志

卷十七

十七

本饒於貲而南薰自奉儉約平居布衣蔬食靜坐一室讀書彈琴其中爲學敦尙實踐不爲冥悟之思尤好施與乾隆四十三年歲大饑出粟振貸活數百家及歲稔里人謝還之辭不受取券中所貸四萬餘金悉焚之卒年四十一著有提省集授古正圖錄備質錄等書

張克廣乾隆癸卯解元天性曠逸終身不仕著有嵩樂堂文集失傳

王靈沼州城內人乾隆壬子舉人選甘肅兩當令地方瘠苦日用不給向有兩當不可當之說靈沼節用愛民百姓多以薪米餽之有大姓願借金使謀調缺靈沼曰若人人謀調兩當無官矣

李大猷樾之子乾隆癸丑進士授湖北漢川知縣值大水捐廉賑濟全活甚衆丁內艱哀毀過度卒任所漢川人樹碑泣曰民之父母

鄭雙南州城內人乾隆甲寅舉人爲葉縣教諭葉處豫邊陲向乏科第雙南敦請縣令擇士之文而秀者親教之本科卽獲售一人嗣後甲乙榜蟬聯不絕雙南之力爲多

張際熙嘉慶乙丑進士授福建海澄知縣平反疑獄人稱神明邑有某生藥械兩任未釋際熙蒞任後歷閱案牘乃恍然曰此生恃才招忌幾至瘐死力白上憲始得昭雪後某生

砥節改行以舉人大挑作令河南頗有政聲嘗曰吾恐愧於張公也
張澧翰道光壬辰進士觀政禮部後掌湖廣道監察御史時四方多故陝當東西要衝差
徭煩重澧翰條陳積弊歲減千金鄉人同深感戴

王體仁字長人惺所先生之裔性倜儻不羈書過目輒成誦善屬文下筆數千言立就胥
中義法年十一應童子試背誦十三經南華楚辭史記等書學使王文簡公極加賞拔入
郡庠旋食餼然數奇屢躓場屋壬辰中副車遂棄舉業布衣草履東走吳越登金焦陟會
稽望窮洋而返入楚取道襄漢挂席至洞庭聞日觀之勝北上秦岱謁孔陵低徊者久之
旋至燕京出三晉渡河至關中躋華之巔覽山川都會之盛以抒其礪礪不羈之氣故其
文疏宕詼詭直追漆園而通人情極物理確守儒者矩矱不求人知人亦無識之者爲人
謹然諾飭內行善談名理文思敏捷間試之乃命司書者數輩進體仁談論自若逐字示
書者不加點竄俄成數幅雖十人疾書終日不能窘書偶訛足成之渾然無斧鑿痕所著
尙書問答孝友梯適君子國崇期遊華峯記擬古草勸學誤聞所未聞錄奇聞叢錄一得
識期善類集試草類集課藝一得並雜文數百篇藏於家

張瑞芝中道光甲午副車初閱報曰吾母望不止此後己酉辛亥兩試均未列正榜乃無

陝縣志

卷十七

十八

志進取以爲前汲汲科第者因父早世母寡身孤冀博誥命以慰萱堂耳今若此命也更
何忍以身外物而易膝下歡乎遂終身不赴科舉後其子栻以增生因轉餉功保舉巡檢
孫坤十三卽入泮卒能以進士爲國會議員人以爲孝思之報

田乃畚州城內人道光己亥恩科舉人初爲酉邱教諭以守城功保舉知縣後卸任歸籍
蒙大臣毛昶熙委辦團練預備守具頗爲得力同治時捻匪三至而城無虞籌防之力足
恃云

張筵州城內人道光庚子舉人性沈靜寡言笑設帳鄉黨間遇貧寒子弟不受束修教人
循循善誘先躬行後文藝嘗有舊家子因家中落貧不能婚娶陰助以貲終身未嘗見德
色後選修武教諭未之任而卒

姚榮甲字鼎三道光丙午舉人居家以孝聞從遊者皆以實學相勗官嵩縣教諭同治間
土匪煽亂嵩人驚恐榮甲與縣令及紳民日夜巡城不辭勞瘁賊不敢近民賴以安年六
十三卒於任紳民勒筆頌德歷久不忘

鄭邦彥咸豐己未舉人淡於榮利教授鄉里沒後門人思其教澤鄉人感其懿行合立碑
於楊家壩驛路旁

張天秩貢生取與不苟品節足風

郭登雅字彬軒一字肆三號少園山莊頭村人幼聰穎讀書過目成誦爲文下筆千言立就未弱冠以案首入邑庠旋食廩餼是時召南書院爲邑文學會萃之所以古學課士登雅入試輒冠軍一時州屬人士所稱三郭鬧院者以登雅爲最然性恬淡鄉試一戰不售遂灰心仕進以歲貢終晚年結廬於居宅後讀書吟咏其中足不履城市者數十年家本饒於貲而自奉儉約於親族貧乏者仗助不少吝嘗檢貸券中有貧不能償者悉焚之以嘉慶十三年六月生同治十二年二月卒遠邇送葬者以數千計

子椿萱清太學生身長六尺儀容脫灑性豁達好義輕財居常與里中名流碩士游堂上客終年不絕戚族有貧乏者輒分田給之不取值族中有待其舉火者歲常數輩然自奉儉約衣服飲食未嘗過度內行純篤事親以孝聞有寡嫂奉之如母治家教子一合義法年四旬於光緒某年卒孫祖繩未成冠方受學遽遭大變然能堅苦卓絕自樹立卒克振家聲

郭立勛山莊頭村人歲貢生能古文辭不爲居業所限先後設帳數十年一時邑中知名士多出其門如奇士王長人爲其高足弟子之一歿後門人樹教澤碑於驛道傍

陝縣志

卷十七

十九

秦迪吉究心正學嘗刻明王惺所先生集以自勉且以勉人焉

趙明道性端慤言行不苟與鄉人居諳諳以修德立行相勗有蕩檢踰閑者必婉言開導俟其悔悟而後已鄉人無不薰其德而向善矣

楊存修歲貢生讀書立品一介不苟嘗館觀察積公墓中有以數百金請託者毅然卻之楊榮光優廩生博學能文嘗設帳受徒循循善誘一時陝之列膠庠膺薦舉者多出其門卒後門人數百爲立坐擬春風碑

白受采貢生積學屢薦未售教授生徒多所成就卒後門人爲立教澤碑

秦虎變歲貢生性仁厚敦尙實行教授鄉里三十餘年一時知名士多出其門尤仗義輕財橋梁祠宇嘗捐貲修葺鄉人有急難必周恤之同治初捻匪擾境人心驚駭虎變倡議修故岩率衆設方守禦賊不得逞鄉人賴以免劫難者八百餘口巡撫鄭元善嘉其有保衛功具題請獎年古稀無疾而終門人爲立教澤碑

水確摯開州判勤政愛民因父疾告歸同治初逆賊擾境確摯倡率團練定禦賊之策著有靖寇管窺兵書及周易註解

張諧之字公和號敬齋野鹿人十四歲喪父獨學無友始爲舉子業十七入邑庠學使俞

長贊以小學聖學入門書相餉遂棄帖括慨然志爲己之學閒復從朋儕處得讀書錄手自抄窮晨夕不倦凡語默起居之細孝敬友恭之大必證之經傳察之隱微內外無憾而後卽安如是幾十年同輩率誹毀之不顧也咸豐九年己未領鄉薦時薛于瑛倡學虞芮之間恪守程朱懿範秦晉豫西之士多執經門下同治壬戌負笈從之遊蹊徑漸親切先儒博雜之說始無所入於其心四年乙丑成進士觀政兵曹會王檢心奉召入都與同處道觀中講論甚樂檢心與李棠階倭仁吳廷棟何子永諸公有舊昕夕過從因得時請業後得吳廷棟評點朱子文集讀之凡中年未定之論批卻導竅諫然以解然後陽儒陰釋之學始能洞悉源流深燭其藪戊辰以母老請養歸里越二載母歿服闕袁葆恆督師關中約入幕府光緒元年再入都供職嗣援例改銓知縣自是以來正學諸君子彫零殆盡上下諱言學偶語及羣譁然惟自學自養自修而已戊寅選授直隸昌黎縣變通呂新吾鄉甲法行之就緒者四百餘莊政簡刑清頗著成效未竟事調補盧龍會灤水漲發衝沒七十村稽戶口振錢米躡穀交道夙夜不遑者九越月嗣署邢臺定興調東明升蔚州惟謹守清慎勤三字官箴兢兢不敢懈年逾六十自爲志述生平之概以爲非迂疏不能與時俯仰就功名誓將解組歸田與二三老友重理經生故業但耕山釣水彈琴讀書以詠

陝縣志

卷十七

二十

先王之風亦足樂而忘老也二十四年致仕所著有困學錄讀書記疑敬齋存彙所輯有儒宗近思錄致仕後居太原歷六七寒暑成古文尙書辨惑二十二卷又嘗題撮影自箴曰弱歲顛侗抗心希古問道洛閩踴瞻鄒魯壯年嬰疾慨然穫落惟是學修條前條卻曾幾何時日月其逝悵過時而不策懼泯泯以歿世誦前哲之格言循先賢之遺躅誓當曠齒之餘景明自拔於習俗光緒三十年卒年六十有九長子懷曾字直卿以納資筮仕廣西思恩府遷江縣知縣以剿匪曾邀卓異保案以知府錄用以光緒三十年卒次子懋曾字振卿庠生以納資補授廣東陽江廳同知在任九年深治民心以光緒十七年卒季子儀曾字佩卿以納資補受山西廣靈縣知縣年四十以光緒二十七年卒於任所又姪奉曾清光緒時任山西汾州府文水縣典史十餘年卒於任所

甯元善字長齋少貧不能專力於學採薪汲水以書自隨旋出授讀自給補諸生應鄉試不售遂絕意舉子業專精儒書聞山西薛于瑛倡明正學欣然從之遊旣歸益信宋五子爲孔孟真傳致力於小學近思錄設教鄉里誘掖後進歷久不倦性至孝在外思親風雨必歸侍親疾親嘗湯藥左右無違居喪如禮初析產讓陝取薄旣弟侄破其產輒以所分田宅與之且屢振給焉暇與里中長老訂村規行鄉飲立社倉重冠昏禮思以所學確然

見之行事終歲貢生元善持守剛毅居心寬厚聞稱人善必詢其詳聞不肖則不復置詞及卒聞者多爲流涕南海黃瓊來爲知州刻其所著丁戊紀災又有農醫寓言疑問冊詩文雜著藏於家

兀煥勳字子炳幼超邁與甯元善同受學薛于瑛及歸于瑛授以爲己圖由是志道愈堅精洛閩書其學以格致窮理戒懼慎獨爲要平正切實不希捷獲艱苦卓絕數十年若一日性和易言呐呐不出諸口至辨駁良知家言則批卻導窾使彌近理大亂真者諫然以解光緒元年舉孝廉方正不赴八年學使廖壽恆薦以教職用十年授密縣訓導年七十矣教諸生敦品勵行躬行實踐又倡行呂氏鄉約爲講小學近思錄取毛詩關倫紀者綴辭歌之在密十年士風丕變而黎氓亦多感發欣欣向善知縣王薪傳雅重煥勳每良晨佳節輒相邀飲酒賦詩往復酬唱悠然有康節擊壤遺意學使邵松年見所著述亟稱之以篤守程朱至老不倦薦加內閣中書銜士論榮之故事學官俸薄補諸生輒責其贄率校豐約競多寡無師生禮煥勳恥之富者不校貧者不受縣多煤礦租入於學諸生貧者輒命辦礦事以其贏自給於是密人士交賢煥勳光緒二十二年卒於任所年八十一著有備質錄感遇錄詩文集藏於家

陝縣志

卷十七

二十一

劉英魁字子傑河底村人父逢勛誥贈武略騎尉英魁幼失怙依養叔父逢雲及英魁貴逢雲誥贈如逢勛英魁以家貧棄文習武初應童子試學使許公奇其壯貌魁梧目爲大器中道光乙巳科武進士欽點藍翎御前侍衛與汜水牛狀元鳳山同供職宮禁在乾清門行走一日有刺客犯宮闕英魁覺與牛狀元同挾彈擊之中宣宗嘉其義勇同加三級遂委兼管六庫匙並賜晏坤寧宮時人榮之後以目疾乞休於同治六年八月卒於家授昭武將軍騎都尉先是咸同間盜匪充斥地方不靖英魁會茅津游擊王應麒籌設團防以備盜又請豁免雜差苛捐以輕人民負擔迄今鄉里頌德子九人樂天樂禮監生樂成樂仁候選千總樂善以品學重樂義以俠義稱樂智樂周武生樂信榜名虎炳兵部差官曾孫彥江字泳之卒業河南第四師範學校歷任本縣縣視學教育局長救濟院長等職因公勞致疾卒於城內寓所

以下探訪

賈邦佐字少卿磁鍾鎮人光緒己丑恩科舉人歷官邠縣泌陽等縣訓導兩縣士子多被其教澤晚年治程朱之學與同里梁良齋相友善良齋爲芮城薛仁齋高足弟子仁齋爲西北宋學大師良齋本其師說講學殺下聞邦佐治宋學卽相與訂交談論頗洽恨相得晚初邦佐歸自泌陽灰心仕進設教鄉里多年成就人才甚衆如張子厚賈子封牛星垣

皆其門下士年六十餘於民國元年歿於家所著詩辭雜文皆散軼
梁殿象字巍卿晚號良齋學者稱良齋先生張茅鎮人生有至性篤好聖賢之學弱冠補
諸生聞芮城薛仁齋先生講程朱之學徒步走從之遵其教法以小學近思錄爲入德門
戶以達於四書六經與華陰王篤齋並稱高第弟子芮城崇祀鄉賢殿象躬率弟子會祭
芮城歿復執贄清麓賀復齋瑞麟甚爲所器重李公菊圃開藩陝西禮以上賓光緒丁丑
晉大饑閻文介公延助賑務運城會匪起山賊應之某軍門督兵來討特詣殿象問計閻
鄉民以加賦故聚衆抗官幾讓大變知州請其往喻事得平息先後講行鄉約鄉飲酒禮
及冠昏喪祭之儀鄉人從而化者甚衆生平取與辭受出處進退之際一以禮義爲權衡
而不敢或苟廣交當世篤行士所之以倡道講學爲己任教人無少長必由小學入使之
曉然於名教剛常之大起居動靜皆有法度而範之於禮義之中事親以禮晨昏定省悉
本仁齋教條事繼母尤得歡心其於諸弟子恆有不和睦者引咎自責或涕泣勸以大義
家人數十口無間言卽生徒有過亦不加訶責爲誦先賢格言以感悟之每日必夙興盥
櫛冠帶以自修整書課程字必楷正如此者四十年非疾病大故未嘗一日間也年六十
有七民國元年四月卒著有良齋遺集四卷

陝縣志

卷十七

二十二

齊太封字履先后川人幼穎悟讀書過目成誦由拔貢登賢書觀察孔公奇其才委主砥
柱書院晚年究心岐黃術以濟世爲懷性和平樂易不立崖岸遇人之急無論貧富貴賤
雖夜必往以故其卒也人多思之不置云

衛若梓字琴齋城內人幼聰敏未弱冠卽入邑庠值楊學使歲試以冠軍食廩尤工詩雕
刻物性獨出心機然困於棘園七薦不售歲壬午貢於鄉於是無心仕進先後設帳數十
年一時邑中知名士多出其門州牧知其學延爲召南書院齋正會闔鄉河岸崩城牆瀕
危觀察鐵公以襄辦建修事見委事竣被薦以教諭用然非其志也晚年精岐黃術刀圭
所及立起沈疴文武各著爭延殆無虛日而尤以貧寒者爲急故人多德之而無怨言云
杜景暹字少潛號菊農城內人弱冠入郡庠光緒戊子科舉於鄉名藉甚先是陝甘回亂
項城袁文誠公督餉關中景暹從入幕府旋遊幕略陽縣及登賢書同里張公和知蔚州
馳書聘主講文蔚書院未幾歸主本縣底柱書院嘗參校州志歲戊戌特選南陽桐柏縣
教諭以目疾未之任晚境益窘然性豪放不檢細行家雖艱窶衣食供俸不少旣尤健談
人有紛難待以排解者雜遝盈門知州某以契稅苛民景暹指示方法令人上控卒褫職
光緒三十二年四月卒著有西行錄葫蘆笑譜菊農存稿藏於家

辛旂鸞字少仙東樊村人幼豪放不羈往往不自顧惜爲世所訾議用此困甚已而發憤猛省痛自責由是折節讀書而才足以赴之爲文下筆千言立就然多激楚哀怨之音又其才氣橫溢不盡中有司繩尺年四十始廩於庠數躋鄉舉鬱鬱不得志光緒二十七年九月以瘡死先是旂鸞與同里薛翹蘭遊翹蘭年差少嘗師事之旂鸞折節與交每見慷慨論天下事若不勝其憤激者當是時國事日棘吏治尤窳敗某歲郡守課士題爲今之從政者旂鸞縱筆揮灑嬉笑怒罵不顧忌諱主者愛其才亦不之罪其生平仗義疎財雖甚貧三黨嘗資其周卹筆耕所入隨手盡遇朋友急難尤肯以身先人人謂其他日發皇飛騰所至不可量旂鸞亦厚自負不意其竟窮而且死眞命矣夫

兀友桂字小山原店村人幼穎異讀書目數行下成童游泮弱冠食廩餼後遊芮城薛仁齋之門遂慨然棄舉業而務聖賢爲己之學嘗與同里張公和兀子炳郭頤正等相聚講道一時學者多向風焉

曲南風字雅堂溫塘村人弱冠入郡庠旋貢於太學不赴屏棄舉業專力經術尤潛心於宋儒之學於小學近思錄等書終身服習不厭先後設帳授徒二十餘年平時足不履城市教人以敦品節習禮讓爲先故及門多篤行士先是南風幼時母病癱晝夜侍側盥梳

陝縣志

卷十七

二十三

躬親污穢不避如是者數年及父晚年多病承奉一如之居喪一本於禮待弟薰風人無間言其孝友蓋天性云

馬椿年字彭十清歲貢生博涉經傳子史爲文持之有故言之成理而佐以精練之氣性恬澹不樂仕進設帳受徒垂三十年足不履城市成就人才甚衆邑人張子厚卽其高足弟子年七十有五卒所著詩文皆散軼

張坤字子厚會興鎮人年十三入郡庠旋食廩餼父少柳憂其勤苦恆戒以節學坤於定省時作安閒狀以慰親退輒刻苦自勵焚膏繼日學殖益進知州吳公初聘入幕及權篆光州復聘主書院講席中光緒癸卯鄉試第四人學制之初變也知州陸公邀留卽召南書院舊址創辦中學堂甲乙兩班師範傳習所高小校各一班又請准觀察胡公改試院爲陝州合屬中學堂附設初級師範陝屬士子得有所歸嚮宣統庚戌河南巡撫寶公保送保和殿覆試以主事用簽分度支部漕倉清吏司行走旋膺河南高等大學堂監督仍食部俸兼優級師範學堂監督時河南諮議局開辦被選爲議員繼任副議長兼正議長國體變革被選爲衆議院議員國會中罷充秦軍第二師秘書又被任滬上中國公學校長旋以縣知事分發奉天任西安稅捐局局長民國七年依法被選爲第二屆國會議員

兼大總統府政治諮議是時國家多故上下交困坤鑿全國實業不振乃於穀陵左右組大豐煤礦公司未及發展遽於民國九年十一月以疾卒於澠池寓所時年四十有七所著兵法十三家類要左傳分類陝縣鄉土志中西醫學串解等書惟兵法十三家類要已梓行季弟坊以清庠生卒業上海中國公學歷充開封師範學校教員本縣勸學所所長河南第二三屆省議會議員爲人和易自如雖困阨無戚容年四十三以民國十八年卒於家

姚鑿生字西平號惶齋爲唐文貞公崇三十七代孫世居陝祖榮甲字鼎三以孝廉官嵩縣教諭考申字亦辰邑庠生兩世俱贈奉政大夫鑿生幼孤賴祖母崔母黃撫育成立穎悟異常兒書過目輒成誦童年入郡庠光緒十四年戊子舉於鄉選授滎陽教諭有能名於時學制初變同里張子厚倡辦陝州中學堂邀主講席後生賴以成就者甚衆方期大施教澤遽於宣統元年六月以疾卒於張茅鎮旅舍鑿生才思敏贍博涉羣籍尤好周髀算經參以遠西數理獨具心得居榮時治梅氏學程日推演恆得法外法旁及詩辭歌曲書畫篆刻皆臻精妙爲人脫灑不羈遇知友宴會酒半酣彈絃歌唱旁若無人視世俗富貴泊如也先是翰林院庶吉士洛陽林東郊與鑿生同舉於鄉見鑿生文卽心折訂交恨

陝縣志

卷十七

二十四

相知晚自是行同車寓同室每相值必縱談竟日夜無倦容既鑿生歿東郊聞之不勝愴然乃爲文表其墓一子柏壽字少平入郡中學堂亦作書畫篆刻饒有父風惜早夭人以比之管小異云

孟相齊字子青號東籬孟壻頭村人弱冠遊泮旋食廩餼清季學使俞蔭甫見其文深加器重鄉試屢薦不售乃灰心進取肆力經史之學先後充趙太守張明甫諸幕西席以歲貢候選教諭宣統初知州陸公聘爲中學堂講席國體改革遂閉戶溫經不復履城市十餘年如一日於民國 年卒於家其學主躬行實踐爲文清切雅潔稱其人教人尤重歷史陝中後生賴其琢成者甚衆如邢兆庠段啟文何鑑等皆其及門弟子

邢兆庠字序伯號靜菴幼穎異不與羣兒嬉從父受讀日誦千言麥秋他子弟皆去兆庠獨登樓手一卷讀倍勤未弱冠卽遊泮食廩餼益思求良師負笈遊瀕學殖愈進文名日噪鄉試不售卽絕意進取先後設帳陝宜洛澠等處成就人才甚衆歿後門人相與樹碑以誌教思兆庠爲人純靜恬澹訥口少言終日靜坐未嘗有怠容其學深邃工古文詞所作碑銘傳贊樸茂淵懿洛寧張守基見其文極爲推許願納交焉

李乘時字聘卿陝縣名族世有令德弱冠入泮聲名籍甚後設帳陝洛間家本饒於貲樂

善好施從不少吝嘗居臨昌川爲陝洛往來孔道行客有困窮者必依助資斧民國初元殺底凶荒出粟施賑救濟村民數百口平時睦鄰任卹濟困憐貧尤不勝書年七十有八於民國十五年卒三子十孫曾孫五芝蘭玉樹茁生庭階人以爲積德所致云

高雲岫字華峯官莊人清歲貢生恪守程朱好讀書不尙辭章主躬行實踐嘗曰敬以直內義以方外易言誠典型也平時足不履喧華地設帳鄉里教學不苟與生徒講書端坐居敬口授指畫必使明了而後已尤重慎獨或閉門靜坐竟日無怠容翰林院編修靈寶薛樹棠布政江蘇時聞其學行馳書聘充西席會有某訓導以罪被拘百計不得脫聞雲岫名懇其緩頰一啟口薛君卽允情某以五百金謝雲岫力卻薛君聞之愈益敬重云

薛勉字退珊號翹嵐大峪口人光緒癸卯以優廩生舉於鄉主講本郡中學校宣統庚戌應吏部試揀選一等以知縣用不就時方籌備憲政各省初設法院試天下明法之士於京師勉中其科以正七品推事檢察官分發陝西任用爲西安省地方檢察廳學習檢察官復棄去民國元年試彰德府地方檢察廳檢察官升汝寧府地方檢察廳檢察長已而改權陝西澄城縣篆澄故巖邑多豪強令莫敢詰勉至捕其尤者三人置之獄澄之田賦向爲豪富人包納歲收贏於民勉令民自封投櫃不假手豪富人豪富人由是益怨會政

陝縣志

卷十七

二十五

府頒行新稅怨者乃藉口牛瘟謀抵制聚黨徒數百千人倉卒擁入治城爲亂事聞上吏廉其情檄懲渠魁事乃平勉亦引咎自劾去修武王印川長河南以勉權襄城縣篆數月復引去自是知當世不可爲灰心仕進爲人質直簡傲與人交澹然無私貌清癯羸弱若不勝衣言語訥訥似不能出諸口然遇疑難侃侃諤諤無所顧忌其學無所師承博覽經傳子史取大義而不循章句於古今政治得失治亂興亡之故莫不深究而洞悉之故其發爲文章壯麗奇肆不守常格晚年以吟咏自娛然多激楚哀怨之音近孟東野吳梅邨年五十有一民國戊辰六月卒所著蒼崖詩文稿若干卷已梓行

馬鎔經字西山會興鎮人以清廩生卒業河南第二師範學校先後充任澠池魯山等縣高等小學校校長陝州中學監學爲人放達不羈美儀容能文章試輒冠其曹宣統辛亥武昌義師起今陸軍第二十路總指揮張鈞伯英在關中響應師次陝縣延鎔經參戎幕深加信任自是患難相從卒以身殉先是袁氏謀帝制西南各省羣起反對是後政局多故南北分裂伯英倡靖國軍於渭北以鎔經兼藍田縣長已而隨軍至盩厔師敗鎔經遇害時民國八年一月也年四十歲伯英不勝悲悼時卹其妻子弟宏運字子周才氣風度一如鎔經卒業北都朝陽大學先後充任河南第三師範學校教員法政專門學校教員

本縣師範學校校長河南民政廳第二科科員以公勞致疾於民國二十二年十月卒於梁垣寓所年四十有一民廳賜卹送櫬回籍陝中人士莫不惋惜焉

牛瞻斗字星垣山莊頭村人清增生設帳鄉里教人重樸實而斥浮夸嘗以士先器識而後文藝時時告諸生故出其門者多敦樸篤行士邑人郭伯庸卽其高足弟子宣統元年被選爲本縣勸學所總董民國紀元被選爲參事會議員參與縣政凡地方利害民間疾苦莫不刻刻在心以憂勞致疾年四十餘於民國 年卒

劉文安字靜軒大營人以優廩生貢於太學例以直隸州州判歸部候選家故饒於貲與同里曲南風相友善南風家貧文安常伙助之南風受之無謝詞隱居田園不求仕進宅旁有穴居一所置書案待賓客鄉里細事少干預創辦里中高初小學又長治城高等小學校爲人和易不立崖岸無少長咸樂就之以民國 年卒弟文傑字子興以清附生卒業法政專門學校先後籌辦地方自治以啟民智創辦師範講習所以興鄉村教育民國十五年鎮嵩軍賈師駐節陝縣聘文傑爲諮議籌劃供支公私咸濟越三年豫陝苦旱殺函之間災黎載道文傑於三區籌辦粥廠一時賴以存活者甚衆爲人質直敦樸訥口勇爲凡事不辭勞苦嘗慨士風不振道德淪喪與人言輒形於色蓋熱誠人也年 歲

陝縣志

卷十七

二十六

於民國 年卒

王棟字松岩晚號愚拙新店人以清庠生卒業河南自治研究所歸而任縣自治研究所所長紡績工廠廠長縣視學兼孔廟奉祀官同里曲子平宰中部聘充第二科科長尋任縣公款局局長民國十五年鎮嵩軍賈師駐節陝縣聘爲參議於時戎馬倥傯億繁苛賴棟建議多見減除衆議重修縣志被推爲採訪員棟挺身負責曰此吾輩分內事也爲人質直亢爽遇地方公務侃侃而談條分縷析一座盡傾平日接人無貴賤差別均各加以禮貌嘗手錄古人格言以示諸子年五十有三以壬申八月卒著有日記及愚拙山人存稿藏於家

楊榮向字欣齋陝城內人優廩生先後設帳十餘年主講召南書院四年及門多知名士性沈靜寡言笑待弟子和靄有家人風爲文清潔科舉初停佐知州怡齡卽召南書院舊址改創陝州中學堂任教務長旋被山西統捐局總辦趙筱軒先後委爲河津萬泉兩縣分局長年四十六光緒三十三年卒於差所歿後門人樹教澤碑於城東郊子繼志字子孝以廩生主講縣高等小學校民國元年被推爲縣議會常駐議員旋被選爲河南第一屆省議會議員同里薛翹嵐宰襄縣聘充第二科科長繼志爲人口吃不能道辭然縷析

義理學有家法以善教名年若干歲民國某年卒於家

王增瑞字輯五又字蓮浦樊村人幼失怙事母以孝聞稍長奉母命出資建學舍延師以教材人子弟有貧乏者代爲給膏火出修金光緒三年歲大稔人相食時增瑞年二十餘出積粟以濟鄉里一時賴以存活者無算越四年入邑庠納粟授儒學訓導以母在堂不赴爲地方興義塾辦保甲立社倉知州扁其門曰德善贊襄宣統初元詔府州縣各舉孝廉方正知州岳廷楷以增瑞薦覆試合格欽賜六品頂戴增瑞工書法臨摹顏家廟多寶塔諸碑晚年獨居一室每日必楷書百餘字以資靜養年七十民國某年卒

戚以敬字修齋一字筱堂陝城內人先世有齊整者明洪武初以從龍駐陝膺宏農衛正千戶世襲指揮使遂家焉父蓉字芙亭以敬周歲出嗣伯父樹棠幼聰慧受庭訓能讀四子書八歲就外傳博涉經傳子史善屬文弱冠入郡庠旋食餼詩賦雜藝尤爲四屬最鄉試七薦卒不售僅以明經終學制之變也先後膺縣高等小學校中學校教員受其教澤者多知名士晚年任地方城防局局長保衛團團長尤著勞績里人額其門曰惠孚東里先是以敬家貧晝日一舉火以爲常旋以筆耕致小康民國十一年六月匪陷陝城以敬被擄半月爲羣賊醫病賊感其意善釋之自是杜門不問世事年五十有九以民國十六

陝縣志

卷十七

二十七

年卒所著史論筱堂日記詩文集皆散軼

張有志字卓堂會興鎮人清廩生先後設帳多年入民國歷充會興鎮高小校校長陝州中學校學監等職年六十餘以民國三年卒

張餘三字豐九會興鎮人清庠生學制初變創辦會興鎮高小校任校長多年作事勤勞教學主嚴勵歿後及門諸生爲樹教思碑於驛道

張世法字希孟會興鎮人清宣統己酉科拔貢生朝考以縣佐分發陝西任用民國紀元縣議會成立被推爲議長已而被選爲河南第一屆省議會議員性褊急遇不平敢面折人某次選舉軍界強加干涉世法與辨爲所挫辱以憤致疾久不愈年三十九以民國九年九月卒於家

高持平字子衡東斜橋人幼棄舉業宗尙程朱嘗從芮城薛仁齋先生問學知聖賢爲己之道被兵部主事同里張公和延爲西賓頗見敬禮居嘗容貌端肅衣冠整齊足不履城市不求人知人亦無知之者年八十餘以清光緒某年卒

陳采風大營人清歲貢生設帳鄉里以善教稱慨後生無歷史常識乃編中華歷朝史略及鄉土瑣言提要二書俾學生誦繙爲人熱心公益事不辭勞嘗集同人組織放足會提

倡女子放足籌辦木機紡紗廠振興地方工業縣之西境風氣早開采風之力足多焉
宋維翰字子三號鳳亭宋家村人欽加六品銜授甕安知縣有政聲記錄十次後致仕歸
甕安人以保民如赤子之傘以送之

秦士容北陽村人先後任棗陽廣華等縣有政聲

郭耀宗山莊頭人清歲貢生以工書名於時筆法脫灑出入歐褚之間一時遠邇求書者
常有車馬踵其門爲人沈靜寡言視當世勢利泊如也以光緒年月卒

張兆鼓字曉堂會興鎮人高祖長庚湖北按察司使調署貴州按察司使兼署巡撫曾祖
大成祖冲翰皆以舉人授知縣叔祖禮翰爲名進士歷任御史知府兆鼓生長名門長入
仕途歷任江西豐城廬陵等縣尉甘肅崇信縣知縣所在有名以軍功昇授同知銜補用
直隸州知州後以致仕歸事母以孝聞生奉死葬均如禮兆鼓性剛嚴才具過人童年卽
嶄然露頭角識者知爲大器及致仕家居縣中有大役皆推其主持官府有疑獄不能決
者郡守嘗詣其家問計往往得其一言而事解觀察某公每東巡道經會鎮嘗問兆鼓起
居其敬重如此是時會鎮商務繁盛肩摩轂擊兆鼓過市人均肅靜勿敢譁雖婦孺皆見
憚同治捻匪之亂鎮人被掠兆鼓歸卽創建寨堡鎮人至今利賴之以光緒年月卒於家

陝縣志

卷十七

二十八

蔡大中字文庵張茅人清廩生設帳授徒數十年循循善誘門下多明通之士爲人沈靜
寡言與世無忤嘗遊汴垣所交皆當世知名士晚年目覩戎馬倉皇戰禍頻仍遂杜門不
出取孫子十家注讀之苦其言簡義奧乃於每句前後襯三五字或三五句期於明白易
曉久之成書名曰孫子觀解又有記災雜詠若干首

張銘字西軒號曉峯城內人明太僕少卿九功裔也讀書通經史大義治舉業弱冠入郡
庠旋食餼清光緒丁酉以選拔貢成均名藉甚光緒回鑾過陝佐郡守辦差蒙獎五品銜
年四十五卒著有芸窗課草

盛宗文字穆如張家灣人以清歲貢生納費授同知銜口吃不能道辭然富膽識凡地方
有阨困敢以身先之入民國先後被推爲農會商會會長有能名年六十有二以民國年
月卒

張容惠字和暢會興鎮人生而家中落壯年猶操苦工能勤儉自樹立卒以鹽業起家以
費雄一鄉性忠厚和靄樂善好施興學校設義塚凡鎮有公益事莫不慨然樂助之戚族
之貧乏者伙助不少吝清光緒某年誥授中憲大夫鄉里榮之而容惠履素猶昔衣服飲
食未嘗過度恆思物力維艱竹頭木屑未嘗拋棄皆留以待用每鷄鳴卽起徧至商店廢

房督促傭人如此者數十年如一日年近八旬耳目口齒如常人步履強健未嘗扶杖白鬚繞胸而面無縐紋望之如有道者八旬初度時家人奉觴祝嘏鄉里以慈德牌帳懸其庭者數十百計年八旬有四民國年月無疾而卒遠邇送葬者以數千計

辛兆渭字礪溪一名鳴雁莘原東樊村人以清武生負鄉望身任地方艱鉅數十年辛丑兩宮自西安回鑾過陝佐郡守辦差以勞績授六品秩辛亥革命山匪騷聚是時兆渭膺清鄉局長單騎往見匪渠曉以大義羣相戒不入境民國八九年至十二三年國內多戰爭軍隊過境絡繹不絕地方苦於供支縣人曾兩度舉襄辦兵差公私咸濟民十六任五區區長以去留請減地方差款雖受罪責不爲屈邑人榜其門曰保衛桑梓兆渭貌魁偉性豪爽有胆略幼讀書史能識大義與人言纏纏如貫珠雖文人宿儒莫能窮尤熱心公益輕財好義能急人之急嘗脫秦樹聲張瑞之阨清末爲本村倡辦學校延名師教讀家主館饋者五六年區人士多出其門其姪孫炳華之讀書成名與有力焉年五十八舉一子人以爲好義之報云民國十八年六月卒年七十歲

辛永祥字逸民貌清奇磊落有奇氣好讀書不喜帖括惟愛莊騷及唐人詩歌善騎射技力常冠其曹光緒己丑應武試中式棄名不居旋營計然之術隱迹市廛常往來峭陵東

陝縣志

卷十七

二十九

西寄興於山巔水涯性解音律善彈阮咸之琴所至以琴書自隨常爲高士吟曰世方擾攘吾以適吾志而已見者皆親樂之少叔父兆渭二歲友愛極篤凡經營所收入聽家中取給之遇人急難事輒慷慨紓財爲之助聞豪貴人至則掉頭不顧叩其意笑而不答以故其名不出鄉里蓋輕世肆志忘懷得失者流也光緒二十五年五月以疾卒年三十八母張氏早卒父鳴皋繼母秦氏皆年近六旬深痛之逾年相繼卒遺孤炳華甫二齡妻范氏守節撫訓至於成名

齊望溪字筱礪雷家灣人清附生設帳三十年門下士多有知名者民國十五年充任第一區區長時兵戎頻興兵差浩繁民大苦望溪嘗以民窮財盡爲詞抗不與至甘受羈縶不顧也區部經費向攤自民間望溪獨裁員役祇留一區丁守門淡飯粗糲親手烹煮減輕負擔民咸感激晚年精岐黃術凡有請無不應立起沈疴者不可以數計二十四年二月二十二日以疾卒於家年六旬有七歿後身無長物家徒四壁而已

王建中字極甫號條南新店村人幼失怙恃依叔父居讀書過目成誦家貧輟學受室後析居以爨時斷炊妻燕氏竈上突常有烟而鄰人不知也建中以勤儉漸置田產起廬舍結交一鄉文人通才碩彥日接踵於其門每論事智常出其儕輩鄉里訟事得建中一言

而解雙方均爲感激建中貌清奇鬚垂於胸聲音高亮如洪鐘人見輒敬重之甥王棟弱冠入邑庠建中每談及史漢諸書事故棟多未知蓋一生交納通儒輩聞之較多也以光緒二十四年四月十四日卒年五十有九長子錫麟少讀書未成棄而業農性直爽鄉里有事能言人所不敢言立爲解決命子樂豐讀典質稱貸竭盡心力卒以成名民國二十五年二月二十七日以疾卒年六十有六

張蟾光字倚樓下莊村人祖父廷楊字廣然一名擇鄰字希孟清太學生爲人渾厚閒雅平居無事嘗危坐接人無貴賤賢愚皆以禮以故人樂就之里人匾其門曰量媿黃生以清道光四年九月卒蟾光幼稟家訓憤志讀書早入郡庠旋食餼能守祖父遺風澹於榮利設帳授徒數十年成就人才甚衆如拔貢蘇師轍卽其高足弟子也

張可從字時學清從九品五歲失怙家僅有簿田四五畝賴祖父撫育成立及祖父歿家稍裕可從能以勤儉自樹立事母以孝教子以義同治初年陝縣迭遭兵荒差徭繁重辦理陝東里櫃公私皆濟光緒三年歲飢創辦社倉鄉人多利賴之爲人輕財好義舅父歿而助之葬甥與內姪貧而助之娶修宗祠輯族譜皆捐資焉以民國某年卒

朱漢字濯之菜園鎮人家饒於貲性好施與同族有名維棟者以負債無力償欲服毒漢

陝縣志

卷十七

三十

聞之遂與百金以解之其子維榜亦仗義疏財當同治初年政繁賦重兵差浩大鄉民爲充里總有懸梁自縊者有投谷斃命者維榜於同治四六兩年代里人充里總倒廩傾困幾致破產終身無怨言光緒三年歲大饑人相食維榜與其子炳光炳治目覩傷心不忍坐視曰人死而我生人饑而我飽心豈能安於是發粟煮粥以食之全活甚衆皆朱漢之家教使然也

張瑞字輯五硤石人也硤石爲舊驛站四圍山村以數十計皆屬之瑞以清庠生主鎮事數十年性剛嚴有才氣勇於獨斷每地方有興作數十村民供其役使唯唯聽從雖退有後言而面莫敢違家故豐裕自是益饒貲累巨萬田連阡陌鄉民半爲其傭奴其家人子弟夏秋出收田租不少寬假里人有行爲不軌者瑞必置之以法死者數十輩未嘗請命官府用是結怨道路側目民國十二年吳巡閱使佩孚駐節洛陽被控逮年餘受贖刑以免由是家漸落而瑞性不少挫其姪任重短小機警有心計以襄辦兵差虧累謀於家瑞不之恤自縊於治城寓所慎重方受學被怨者狙擊死於城南郊子紹重尤驕氣凌人大事報復怨者益衆常羣起攻之不能勝十九年韓復榘主豫政聞其豪暴捕至省府處極刑籍其家瑞在洛聞之痛憤而卒未幾其姪保重亦被某軍部處死戚朋株連死者數人

得禍之慘爲縣中所未有蓋自秦漢以來豪強兼併之風盛而貧富之階級愈分太史公以素封之家比封國之君方瑞盛時坐收田租之入不勞而彌富家人皆衣絲策肥其何以異然瑞不悟保泰持盈之道大興土木門前木工石工常數十百人終年不絕所居宅第窮極壯麗物盛而衰理勢然也楊子雲曰高明之家鬼瞰其室卒之及身而敗第宅寢成茂草矣

馬超元字伯羣河底村人幼穎悟讀書過目成誦後以家貧輟學經營貿易暇則瀏覽古今稗官野史晚年精歧黃術醫人未嘗求報嘗檢遺券數百金慨然焚之有何某者持金來償超元曰吾既焚券於前何得索償於後失信於人吾不爲也竟拒不受癸亥春歲饑家無餘貲乃假貸息金購米濟人鄉人義之性豪放不檢細行然勇於義舉雖受困阨不避也富記憶雖年已老耄雙目失明而說部傳奇中之忠奸賢愚凡經超元過目者皆言之纏纏卽甚叢瑣之事如所醫人藥方千餘條亦能一一記之年九十於民國某年卒楊從治字珍卿新店人幼失怙母衛氏守節撫養以至成立嗣家致小康嘗以讀書未成爲憾設塾課諸子讀敦禮師儒惟恐不及生徒有窮乏者輒仗助修膳資不令中輟人咸稱之子正誼學成問政曾代理本縣知事鄉里榮之以爲食德之報云從治以民國十一

陝縣志

卷十七

三十一

年十月十八日卒年六十一歲

郭士剛字養齋山莊頭人以勤儉致小康處世接物深合義理雖未嘗卒讀然於國家地方利弊頗能見之不謬言之中肯尤善治家其子光麟雖當童年每自塾歸不令與羣兒戲必面試其課程不少寬假光麟稟受庭訓勤讀倍其曹弱冠入郡庠旋食廩餼是時清政府以國勢積弱力圖變法罷科舉興學校陝郡初設中學堂風氣不開肄業者無幾士剛首命光麟肄業其中旋令負笈入北都肄業國立法政大學甫卒業武昌義師起清帝遜位民國肇建光麟以優學被薦爲河南臨時省議會議員已而被選爲第一屆衆議院議員由是家益豐而士剛自奉儉約如故居常好接納文士與同村牛星垣先生最爲莫逆光麟之遊學北都牛先生贊助之力居多既牛先生死士剛厚助其喪葬士剛年七旬有幾以民國七年卒汲人李敏修銘其墓同里薛翹蘭張子厚均爲之誄

何振西子銘軒新店人幼時家貧輟學讀書未成嘗引爲深憾設塾延師課子鄰人子弟咸知向學成名者日益衆子超凡出就外傳稱貸在所不顧學成問政曾護理本縣縣長有聲於時振西性直爽自奉儉約而好接納文人款洽惟恐不至好施與有告貸者嘗量力仗助無吝色里人楊正誼倡築本村寨堡及小學校舍振西慷慨捐貲數十金并力爲

襄助卒觀厥成販牛商遺牛於途振西拾得詢還牛主不受謝超凡路拾遺金二千元滯於途以待竟還失者謝金分毫不受其素稟庭訓然也振西以民國二十四年六月卒年六十有四

曲勤學溫塘人昆仲三勤學居次長季皆成年不祿又值光緒丁丑歲大稔勤學以年少家計彌窮母亦鬱抑病卒繼母呂勤學事之以孝聞自是來往經營家道日盛親族急難有餘則濟之以貲財否則助之以力排難解紛理其曲直諭以禍福弱者則溫詞以慰其心強者則正言以折其氣孫完善學成問政有聲於時勤學以民國十七年五月二十五日卒年七十有六縣長辰谿張簡生曾爲文以表其墓云

人物傳二

按各方志對於人物每仿史例多分門類顧以一邑之大自不能與國史相衡而量度比附殊涉牽強龔志於人物後分孝義一門所以錄其小善片長以爲鄉里之勸而趙志則創忠節之目專載遇變捐軀者茲兩取之凡新有採訪各以類相從蓋方志之體不宜規之過高使往者無遺憾而來者有所勉云

忠節

陝縣志

卷十七

三十二

宋

宋炎以蹶張補秉義郎金婁宿圍陝炎射死金人數百比再圍引勁弩數百發毒矢殺千餘人城陷金人愛其善射欲活之炎不應併力戰死

明

李情字宗善宏治癸丑進士爲監察御史彈劾不避寵戚擢湖廣按察使僉事改山西風裁益著閹瑾摘其失謫驛丞瑾誅復僉事升江西副使正德八年姚源洞賊王蔡等叛情率兵討之不克遇害

許達允錦衣指揮李自成陷京師不屈死

崔儒秀字傲初少負氣節爲文多豪邁萬歷二十六年進士戶部郎中遷開元兵備僉事時開原已失儒秀募壯士攜家辭募行經略袁應泰以兵馬甲仗不足恃爲憂儒秀曰恃人有必死之心耳應泰深然之遼陽被圍力守東城矢集如雨不少却會兵潰城陷儒秀痛哭戎服北向拜自經死事聞詔贈大理寺卿建專祠額曰昭忠諭葬子維四陰錦衣千戶先是儒秀少作歲寒松柏論痛敘往古忠臣烈士慷慨激昂忠義之氣溢於言表有當事者題其後云此生氣宇非常異日必爲國家忠臣及奉檄守遼果以身殉城臨死書其

襟帶云遼陽失陷臣有何顏無力報國甘心九泉著有百將傳乾象考行世

劉岱神宗昭妃之弟幼事儒業明於節義長襲父應節爵尋以妃有保護二帝功及主大婚禮馳恩晉階少保兩賜蟒玉弟化亦晉左都督賜蟒玉子蔭錦衣者四榮寵一時稱盛及寇陷燕京思宗自縊煤山岱屬其弟若子若侄哭曰吾與若世受國恩今至此義不可生闔門舉火自焚男女百餘口無一存者

趙良棟字德隆號仰峯整屋訓導廷輔子也少從王惺所講學多所發明惺所見其敦謹遂以孫女妻之以歲薦歷任東萊教諭生平正直無阿與張抱初相商權致仕後聞寇南侵偕次子德易同寄灑池城陷父子挺身罵賊被殺闔門盡死兩縣俱以節義聞蒙題旌學有淵源家傳忠孝是父是子慷慨赴義以捐軀若媳若孫相繼投井以殉難陝澗並祀鄉賢祠

蕭大成萬歷庚子舉人宰利津歲饑多方賑貸貧民賴以存活者無算海運軍每騷擾居民申部院鈐束之升淮安同知致仕歸值流寇襲陝州城陷投井死祀鄉賢祠

傳史譌蕭爲萬

梁可棟萬歷丁酉舉人宰盱眙多惠政人士感而尸祝之擢山西平定知州尋丁艱哀毀

陝縣志

卷十七

三十三

三年如一日居鄉廉潔自持未嘗通竿牘待人渾厚不立崖岸明末寇起助餉守城城陷被執罵賊不屈死之祀鄉賢祠

王後遜學生流寇入陝州守舉爲練長率鄉勇堵截賊勢猖獗同弟二人戰死州守嘉其義祭之

李君賜宏農衛指揮流寇攻城率士卒死守及城陷與賊巷戰身中箭百餘死之君賜妻呂氏抱印投井死

曾希孔廩生性敦樸尙節義聞賊攻城逐戶呼衆倡義監守城陷與指揮李君賜同死焉張我正明季寇亂一方倚爲保障者數年辛巳賊掠本村率衆出禦立殺三賊已而賊至益衆鄉民奔逃我正奮臂獨戰賊愛其勇欲擒之力盡勢窮遂罵賊自刎

張我德我正弟寇縱殺擄掠我德恐辱於賊驅合家二十七口登樓自焚罵賊不絕死所遺惟幼子翔蛟清初順治七年翔蛟遊庠哀慕之忱終身不替翔蛟子大受善事繼母撫弟大壯友愛綦篤人以爲忠義之報云

張邦乾明末被寇掠迫入賊黨邦乾大罵不屈自刎死
許輝爲陰陽官崇禎六年被賊掠比死罵不絕口賊怒遂屠其家

田鴻圖訓導流寇圍城急衣冠北向拜畢合家即投井死

高第崇禎八年流寇犯境力窮寨破義不受辱罵賊投崖而死其子齊峒殉之

靳謙吉字義箴弱冠中鄉試賦性剛毅不隨時俛仰尤篤孝友崇禎癸酉流寇逼城人皆遠遁謙吉自矢曰吾雖無守土責亦朝廷培養之人豈忍向草間求活耶竟被寇執不屈死之贈光祿寺丞僕人梁一龍劉學言亦殉難焉

常省身邑諸生寇至率家人據險迎敵苦戰二晝夜弗勝先驅妻子雉經舞劍長嘯自刎而死闔家淪沒

王衍範真定府巡撫徐標中軍官逆賊李自成犯京師兵叛殺標衍範死之事聞卹贈總兵

常嘉元苦志讀書屏絕世務賊至突入其室猶正襟危坐俯几吟哦勵聲叱賊遂遇害

完璧守禦所百戶崇禎癸酉賊至堅守孤城空拳迎敵罵賊冒刃而死卹贈二千石

孫孕秀火焰寨諸生距縣稍近明末寇變凡傳報聲息潛請援兵調取鄉勇應接孤城者多出其力後與賊戰死焉

戚名彰州城內人以武舉官滑縣營把總嘉慶十八年教匪陷滑城名彰聞變與猶子蕙

陝縣志

卷十七

三十四

率兵巷戰力竭死之一門殉難二十年奉旨賜雲騎尉世職襲次完時給予恩騎尉世襲

罔替蕙入祀忠義祠嗣子華補王祿營守備署陝州營都司綽有父風

見中州先哲傳忠節一

段丙南州城內人道光十五年武進士授藍翎侍衛選廣西全州營守備尋署提標左營

守備二十七年剿湖南會匪防守西延明年灌陽會匪起平樂陽朔莠民乘機響應將薄

平樂府城丙南隨副將周濟成等赴平樂擊平之以功擢都司護理提標中營遊擊初廣

東欽州靈山故盜藪毗連南寧府屬二十九年七月餘孽竊發擾及上思州丙南赴靈山

協剿戰屢捷賊竄橫州復敗之於平福墟餘賊竄攻賓州丙南追擊遇賊程村賊負險拒

我軍丙南親燃大炮斃賊甚衆直前衝擊猝中炮傷賊大至丙南裹瘡血戰奪矛殲二賊

以傷重旋亡事聞照參將例賜卹賞雲騎尉世職襲次完時給予恩騎尉世襲罔替翰林

院立傳入祀昭忠祠

見中州先哲傳忠節二

辛鼎甲陝州東樊村人道光丁酉武進士授花翎侍衛咸豐三年選廣東惠來營遊擊四

年五月潮陽盜起攻惠來歸善鼎甲督兵擊之擒斬無算旋以衆寡不敵歿於陣寇退得

其尸面如生事聞加贈參將銜賜葬祭費賞雲騎尉世職襲次完時以恩騎尉世襲罔替

入祀京師昭忠祠

見中州先哲傳忠節二

曹三祝太陽里人少諳兵法狀貌魁梧道光壬午武進士授藍翎侍衛官福州都司以功
海升建寧鎮總兵遷漳州鎮總兵威名大振海疆倚若長城咸豐三年會匪犯漳州三祝
率所部出戰務獲渠魁會賊衆蜂擁而至三祝孤軍力戰後援不繼力竭勢危乃高誦男
兒不負君恩意死在沙場是善終城陷被執罵賊不屈死事聞照提督例賜卹賞騎督尉
並一雲騎尉世職襲次完時給予恩騎尉世襲罔替並發葬祭貲遣官致祭翰林院立傳
入祀京師昭忠祠及陣亡府城昭忠祠諡襄愍子三人長鵬彪韜略能承家風官鄜州
營都司咸豐三年四月粵寇北犯檄鵬彪率所部五百人赴山東江蘇防禦行抵中牟遇
賊接戰陣歿追贈遊擊並給予雲騎尉世職見中州先哲傳忠節二
姚雁字州城內人以卒伍補內黃營經制外委道光二十二年五月奉檄赴江西助勦夷
匪遇賊寶山接戰陣歿年三十一卹給雲騎尉世職襲次完時給予恩騎尉世襲罔替
李凌雲州城內人寶豐縣荆制外委咸豐二年奉檄赴湖南與髮逆接戰陣歿光緒十年
卹給雲騎尉世襲
甯逢辛鄉勇鹿坡村人年五十六同治元年五月隨衆守隘禦賊遇害長孫金中年十五
次孫銀中年十三俱隨祖守隘被殺一門殉難

陝縣志

卷十七

三十五

陳凌雲以陝籍入澠池庠生同治元年率衆禦賊不克而死事聞得旨賜恤世襲雲騎尉
入祀澠池忠烈祠

張巒熙歲貢生同治元年捻匪竄陝賊欲裹脅巒熙罵不絕口賊大怒欲殺之巒熙引頸
受刃面不改色賊服其忠義遂釋之

張天經貢生主衛村寨同治五年九月賊攻寨甚急天經率衆日夜堅守不避艱險積勞
而卒

按舊志所載民人死難者甚夥當捻匪過境大局糜爛與近世土匪頻發其無辜殞命
者難以悉數茲概書以名於後而約提其事亦所謂一字之褒云

李振賢 李小另 王永太 任興邦 任秉金 任長升 曹長盛 牛多才 牛禿
子 牛銅娃 牛金拴 王平 王雲 任四撈 鄧發雲 鄧迎泰 鄧金福 鄧玉
林 賈天錫 趙英文 趙百齡 黃金榜 賈小知 鄧天賜 賈小巷 鄧海八
鄧如雲 曹雲川 劉花東 劉朱喜 候選訓導王蘭芝 王永吉 捐職千總張耿
奎 從九品銜張聖基 梁懷禎 從九品銜張翼之 馮金枝 水秀 李國壇 楊
文福 生員賀聘來 從九品銜丁冠軍 武生師學濬 從九品銜張宇昕 鄉勇梁

小牛 梁國楨 左文煥 梁繼周 張小宋 韓會林 趙鳳舞 孫來舉 孫元辰
王增相 朱無濱 張耀魁 王福成 楊國玉 楊國太 左二煥 張珠奎 馬
小虎 梁孟子 梁得新 靳廷賢 張法枝 楊順昌 胡長興 宋全 宋福 黃
得成 任成元 劉全德 劉全柱 柴自福 宋自立 劉文太 郭小成 師學富
師振元 師學耀 甯鳳鳴 越安珠 孟小來 郭四成 陳廷琳 陳立心 陳
根拴 陳天真 甯占元 胡管 賈可元 劉克明 劉玉林 郭林合 郭安成
郭步雲 馬存盛 賀西羣 馬存祿 甯五陽 丁元順 楊振倉 續光和 趙隨
王三定 范小鎖 王小馬 鄉勇邱瑞章 邱百娃 邱成娃 邱圪塔 邱隨成
邱香娃 邱小鑾 邱小洋 邱太娃 邱臨相 邱小業 董乾元 水保金 歲
貢生候選訓導王景運 耆民王金貴 王三管 貢生張翼如 奎文閣典籍閻致秀
劉致中 宋思明 李克裕 侯長盛 任廷元 張煥名 侯純熙 張遂元 耆
民孫起會 馬興德 張小磨 段金元 成能 成玉 張謙 高子元 柴可友
陳若菊 柴希閔 蘇元魁 蘇化魁 朱萬春 王成林 張戊申 張隨鳴 楊狗
功 陳學忠 張小合 吳殿元 王根升 張學德 蔡德彰 張康福 甯天祥

陝縣志

卷十七

三十六

甯世平 甯世秀 甯中林 劉生秀 李雙羊 李國元 姚姓 曲聲莊 王隨樂
曲木名 曲根得 曲希轉 曲思子 曲于魁 成樂祖 成可選 成丙子 成
繼祖 賈甲辰 張發財 張溫儒 張學海 張殿魁 張羊生 張爭利 張東陵
張東漢 張甲子 張地動 張傳 張戊子 高法周 王定成 劉元相 任秉
元 奎文閣典籍閻學韶 增生程宗洛 儒童程玉麒 程明之 生員李文炳 監
生周歧 生員張勵升 張興盛 阮隨春 阮長春 劉丙寅 劉金寶 周清綸
孟恒德 陳長吉 趙小月 趙天祥 李定法 杜明仁 張西來 呂馬拴 呂掌
珠 秦永林 呂孟子 蔡別子 鄭希方 鄭德宗 鄭逢辰 王蘭 王芸 張良
鄭恒德 鄭金魁 鄭建功 鄭恒英 蔡學彥 蔡小剛 郭景保 潘思鳳 胡
進德 張小文 陳天珍 王臨道 監生段學易 監生段召南 從九段學隆 生
員曹允升 段三樂 段河清 段占魁 段三性 段一元 段來保 段遂林 段
黑漢 段西來 段蔭祿 段湘南 段占元 曹豐年 趙二年 董小祥 李黑娃
張令 周小海 徐珍 王遂保 賀四武 茹玉海 陳金秀 李遂觀 曹鳳瑞
衛元林 段國禮 段小明 衛法林 李九成 李九德 李黑小 杜萬書 李

鶴鳴 從九品銜尤世隆 茹夢花 張法周 胡法元 曹元勤 李鶴鳴 段雲路
馬克成 張三元 陳世貴 陳繼保 陳繼周 孫相來 周遷義 聶小記 孫
小善 陳杰 秦冠三 秦永祥 吉恒德 李石滾 何正發 何早觀 何雙觀
聶貴 張三相 李登鰲 李來娃 王定午 成學易 曲從亞 王剛 張合魁
甯世偉 甯世界 郭永謙 賀月娃 秦平山 秦小擔 王金庫 王小購 郭福
生

以上共三百一十八名皆死於擒匪之難均於同治五年七月經於巡撫李彙奏奉旨
交部分別照例旌恤勝於戕賊草菅無人過問者多矣又有

段鵬南 梁隆邦 柴天漢 鄭成蘭 譏叙六品景高升 趙作楫 趙玉璫 趙世
山 趙生輝 趙福祺 趙行周 賀小定 高法林 李宗榮均遇賊不屈而死例得
備書 以上
趙志

七義士者皆少年陝縣原店村人而不同姓相與爲刎頸交性勇敢負氣節聞人談古之
游俠如劇孟郭解之風不禁傾心嚮慕平時喜雪不平遇人之急難敢以身先之雖赴湯
蹈火不避焉民國十四年春匪首鄭復禮甯田生盤踞寺原時出搶劫五原張家灣溫塘

陝縣志

卷十七

三十七

等村均被其害原店與諸村比鄰人心惶恐七少年憤氣填胸爰邀村人組織民團乃曰
慢藏即誨盜有備則無患衆以爲然二月二十六日味爽鄭復禮等果率匪徒百餘人蜂
擁而下七少年早率團丁各執刀械伏村南要隘匪至突出擊之匪雖持利械倉皇間不
及施肉搏約兩小時匪死傷甚衆遂鼠竄奔逃七少年率團丁尾追欲得匪首而甘心當
是時鄭復禮甯田生形同困獸拚命開槍以冀幸免七少年憤不顧身一往直前卒以衆
寡不敵相繼中彈而死匪由是得脫不暇回顧自是之後鄭匪不敢下原而三區以北各
村得以無驚七人者蔡泉水兀五輩兀夢國兀百忍兀保松兀吉星張天照嗚呼七少年
未嘗學問然能慷慨赴難義不返顧所謂見危致命者非歟亡七人而賴以全活者什百
倍之故人呼之曰義士云

張虎臣字崇林陝縣岳莊村人以堅犄卓厲聞鄉里被推爲民團團總於時陝東萑苻遍
地搶劫架票時有所聞虎臣籌辦守望無或稍懈每聞告驚目不交睫民國十二年九月
二十四日突有大股土匪千餘人蜂擁而至村故有礮臺以防賊虎臣急登臺射擊自朝
至日中辰困守孤臺外無救援賊益衆圍之數重彈如雨下虎臣無懼色俄而村中房舍
多被炬虎臣知大勢不支乃仰天嘆曰吾爲衆所推今日抗賊無狀有何面目對鄉黨父

老又曰士可殺不可辱豈可令刃汗吾頸遂北向自剄死遠邇聞之知與不知莫不傷悼嗚呼士窮見節義觀虎臣臨死數語可以興感矣彼世之處變故而俯首屈膝甘作囚虜而不知恥聞虎臣之風能不汗顏歟人故有一死死或重於泰山或輕於鴻毛蓋一轉念間而芳臭立判若虎臣可謂臨難不苟免者也虎臣死鄉人樹石以紀其事而爲之歌曰白虹貫日兮天變呈壯士臨難兮無求生慷慨以赴兮志先定光繼睢陽兮名昭汗青二侯趙尙刁盧合傳

昔孔子謂君子學道則愛人小人學道則易使也又謂上好禮則民易使也自改革以來新思想輸入紛競雜糅多以聖人之言爲無用甚至於廢經不講以致赤氛遍地羣盜滿山地方秩序不能維持而始歎聖人之論顛撲不歿聖人謂民之易使由於上之學道好禮彼以不循軌道之政治而徒於壓制役使其民遽可得哉吾編陝志覽侯邦華侯英倬趙士彥尙佳賓刁登桂盧泰定諸人之事不禁有隱痛焉侯邦華字子文爲侯家溝人當明末清初土地荒蕪朝廷有勸墾升科官卽陞賞之令州牧吳世英捏荒作熟浮報至千有餘頃於是數年州官以錢糧托累人民苦於征求逃亡甚多侯邦華以不肯離其桑梓遂被羈押拷掠斃於獄中洎劉牧芳顯再三申詳豁免包荒而民始安業越二百餘年同

陝縣志

卷十七

三十八

治之末季知州周仁壽以摧印契稅民不堪命而有聚衆交農器之舉貢生侯英倬卽侯邦華之宗裔逮捕到案直承不諱周因其文士而原之趙士彥爲明太常寺少卿完璧之裔孫慷慨自首解省囚禁數年尙佳賓被捕急衣婦人服坐紡車中冀幸免而不獲刁登桂善於辭令到省覆訊對上官敢言而事卒以白周解任去盧泰定擅拳術當民衆敗歸獨以身斷後胥役不敢近北川一帶無受捕者夫在專制時代蚩蚩之氓敢起而與官抗其淫威毒痛可知考吳世英周仁壽皆非奸貪之吏吳之修志於驛站之困漕運之苦方懇懇言之爲陝民謀所以生殖者而一念希蒙獎陞多報開墾反貽閭閻之災素心幾無以自明周仁壽當擒匪慘殺之後採訪忠義節烈呈請恤典而深悼家鄉與蒞官同一浩劫迹其平日施爲亦頗有整頓拯濟之意乃稍存發財之私逼辦契稅以爲此多係富民也而牽動株連卒之身名兩隳則夫爲民牧者操術不可不慎也予感於吳周均科甲出身才具優長不免逼迫無辜而諸人以一時義氣並蹈不測其結果又各不同侯邦華身死而子孫繁昌六世之後樹表阡隴侯英倬之得脫在周猶有容善之量趙士彥尙佳賓同拘囚而卒釋刁登桂之舌辯盧泰定之膂力不惟自衛而兼能護人要皆非始料之所敢必者故仿太史公合傳體拉雜書之而重歎民艱之可畏聖言之不可易也後之君子

其尙以是爲殷監乎

辛亥革命地方擾亂民國以來土匪蜂起倚山一帶受害尤巨人命等諸螻蟻良民朝不保夕或閉戶以罹害或對擊而捐驅不有記載何以覘時局而重民命乎惟多不勝書姑仿前例列名而附於忠節之末云

趙天心 師漢章 郝任民 張士臣 李寅項 楊庚甲 牛光前 牛明昌 牛光耀 牛光正 牛俊山 牛光治 牛小平 牛小餘 郝五全 郝秦海 辛模性 尙龍昇 尙步霄 張小模 水仁宅 張更改 張明海 張世命 趙夢固 張喜科 張青魁 曲良平 曲張記 曲光東 曲尙周 張根邦 張四海 張全拴 張青蓮 張虎臣 張海牙 尤銀鎖 尤萬益 張狗碰 尤銀生 馬彥榮 馬發廷 馬四合 張松北 張文成 尤張氏 尤興讓 伍興殿 秦小三 水天中 水明藻 水交始 水志和 水克正 水小環 水拴明 水狀元 水鐵拴 水五昌 水玉磬 水逢玉 水吉利 水小川 水天順 水明照 水鴻仁 水耀明 水困恩 水小羣 水甲辰 水星辰 水聖恩 水鑾秀 伍有邦 田得中 王魁昇 王三點 趙克禮 刁炳午 楊魁變 楊小鎖 趙三管 張小義 楊書水

陝縣志

卷十七

三十九

師小鍊 杜占魁 杜占福 王瑞娃 章成羣 章士福 章三晚 孫張記 趙重三 楊二 趙鐵環 沈長合 雷羣祿 許長庚 張金玉 劉世福 沈保全 馮王氏 馮小科 馬張海 史師氏 史兵春 曹入海 蔡守信 白雙海 王閏月 白銀娃 白明德 張滿學 周玉順 程德魁 李瑞芳 李長河 毛改明 趙銀娃 孫邦治 張己卯 秦沈氏 陳登堂 孫建邦 李小旺 李如智 楊小點 楊明順 李張氏 劉孫氏 劉桃拴 李餘科 劉小海 劉小拴 李點官 李玉鎖 劉呼蘭 劉呈祥 程三官 劉鳳儀 劉和尚 宋兵福 張兆新 馬四卯 馬圪鞬 馬興治 宋小五 常居才 馬振漢 馬九經 沈萬興 沈長太 沈振甲 沈兵升 沈振奪 沈振河 沈萬口 沈長蘭 沈長發 沈長盈 沈長榮 沈善萬 沈丙戌 沈長江 沈長河 沈長庚 沈小昌 張虎娃 沈小三 沈長順 沈小鴨 沈長貴 沈小雪 沈永盛 宋立鎖 水過中 辛十味 趙國棟 趙小福 王長川 王書堂 石辛木 辛鐵鎖 張三正 藺文學 李遂科 張昌娃 秦海水 辛水旺 王三明 王劉氏 王張定 王六成 王小銀 張西來 張俊陞 王長太 王百齡 崔官年 張小勝 張辛卯 郭遂有 郭周旺

水小苗 任述旺 任士校 谷胡藍 黃小寅 韓書和 韓官鎖 韓希聖 谷小喜 曲皂官 郝小中 史十項 員光彥 員李氏 刁俊恭 刁樹相 刁俊選 刁雄壯 刁應瑞 刁堂學 趙世鰲 趙希倉 趙摩拴 張寅泰 張馬氏 趙王氏 張尙氏 張俊秀 張小柏 張彥照 張忠學 張羣照 張小正 張普照 張彩書 張金鎖 張福海 張匪變 董財旺 牛登科 賈成宣 董仲科 楊魁 變 尙生華 尙英儒 趙精忱 王台娃 王振魁 李來芳 李興正 賈樹聲 貧龍照 貧逢治 王升旺 王五保

孝義

唐

楊 牢字松年宏農人父從田宏正死於趙軍牢走常山二千里號伏叛壘求屍歸葬銜哀兩血時稱孝童年十八登大中二年進士第最有詩名

宋

張化基 闔用和 楊忠義真宗祀汾陰時考制度吏馬起言化基等皆聚族累世孝悌可稱並降詔褒美優賜粟帛

陝縣志

卷十七

四十

張文裕六世同居淳化間詔表門閭明

習 潤少孤事母以孝聞母卒哀毀骨立時盛暑潤禱雨輒降數日清涼人以爲孝感既葬廬於墓日夕悲號負土成墳詔旌其門成化間舉孝行見明史孝行傳

王 瓚事親孝母沒廬墓側三年時有孤鶴棲瑩樹任遊龍令升南京貴州道御史歷陝西僉事

張 籌廩生母高氏沒築室墓側枕塊旣掘地得古磁枕枕之居三年有狼護墓側鵲集蛇繞之異涇野呂柙遺之詩云周穆遐遊得白狼張籌墳上夜爲防世人不識青天近錯用工夫半失羊祀鄉賢

張國寧性至孝父耆年定省不輟及有疾禱以身代三事繼母得其歡心年三十妻亡不更聘云

高允升郡庠生至孝性成母亡廬墓側三年不易志父歿未葬不入內室無異喪母時

尙籲俊樸厚不尙文飾父柙明經卽世事母朱氏力田奉養朝夕不忘

韓鳴廷府庠生性至孝父患癱瘓六年不起鳴廷親侍湯藥久而不倦子沛歲貢生亦至

孝三事繼母始終無間讀書課徒曲成甚衆生平與人無爭五十舉子性善早膺選拔沛享年八十有一

史太羹兄作羹明末州庠生崇禎十三年流寇陷陝賊欲致其兄於死太羹請代賊杖之至百止存一息幸不死兄獲免知州潘署其門曰悌弟可風

郭捷性甘淡泊居家孝友成化二十年歲饑羣從數十家乏食盡出資產全活之應歲薦次貢以老貧告雖不獲請終不求仕進壽八十終

郭興宏農衛人妻衛氏嘗早起見遺金六封拾歸明日有趙禮者泣涕尋覓興急還之封識宛然禮分金以酬拒不受孫禎中宏治戊午舉人夫婦壽九十

王達成化年輸粟千石助賑救賜爲義民

劉國卿南康通判劉蘭之祖嘉靖三十年歲大饑輸粟五百石助賑救爲義官

衛世泰性孝友父病革以幼弟良心屬之世泰曲意撫育使力學食餼於庠弟歿撫孤侄成立亦入庠食廩餼有邢姓者因貧持券以墓地求售世泰如券賂以金不責償戒無他售里人稱之子濬登賢書

何中鯉州廩生萬歷甲午大饑人相食中鯉出千金賑之全活甚衆御史鍾化民題詩建

陝縣志

卷十七

四十一

坊

潘桂夜行拾金一裹重四十兩有羅三友姓名晨起訪還之其人割金謝不受嘗至關帝廟見廊下臥一病夫施藥調理及愈給路資遣之州守表其門

趙崇信力田有儒風好濟物鄉里貧不能殮及客死者給棺具病者施醫藥三十餘年如一日也

孫世寧家小康創建東三里舖及老君廟補葺古橋尤多

蒙守官好義急公修硤石山路二十餘里出已資無吝色又以山高無水結草廬於東阜鑿井烹茶以飲渴者行人至今賴之

事詳張天德修路記見文徵

楊材以商賈爲業慷慨仗義戚友多所資賴貧不能償債者材輒焚其券至二千餘金人皆羅拜頌德後子孫繁衍人謂厚德之報

燕亮王廷枚並協辦本里糧差值萬歷三十九年歲大饑亮煮粥龍門口廷枚煮粥橫渠里兩月之久賴以全活者甚衆雖破產不恤也

陳彥忠隆慶朝義官嘗捐百餘金修新店石橋萬歷丙戌歲饑輸粟三十石入州倉協賑自爲粥濟近村饑民有蔡姓者悖獨無依彥忠月給米麥資其養贍凡十餘年死則殯葬

之年八十有二卒

趙珂性孝友伯父母相繼逝遺弟佩尙幼珂撫育之明末寇至負弟逃難數載風雨寒暑無怨終獲保全人傳頌至今不替

清

王經言以悟元孫貢生候選州同恪守家規動止有法四世同居宗黨待以舉火者數十家

王節昇節婦岐氏子少孤家貧事孀母盡誠孝母疾衣不解帶親供湯藥者三年又以母病施茶於磁鐘鎮三年施地於溫塘村后土廟二十七畝建道院三間母故葬分兩塚昇不安親負土合爲一封往來過墓必瞻拜致哀至老不改里人欲舉孝行節昇固辭曰我本不孝又借父母沾名是重其不孝也衆乃止年五十舉三子卒年八十

張壹天性篤孝事父母色養無間親歿前後廬墓共六年雍正二年旌表

通志

蔡金鵬庠生母早喪事父及繼母盡孝歿後前後廬墓六年日培墓土墓在深山中虎狼出入或勸之歸弗聽乃作文祭之虎狼屏跡鵬同母弟異母弟各三人友愛敦篤雍正三年旌表

通志

陝縣志

卷十七

四十二

鄧白璧弟蒼璧庠生父死兄弟皆廬墓三年州守陳表曰孝友可風巡撫雅登之彰善錄兀懷恩父病劇懷恩禱於天願以身代且割股肉以進父病遽瘳知州孟給額獎之樊德輝家貧而孝父病服藥不效輝割股肉進病遂愈

王忠母得胃疾百治不瘳忠割股肉煎藥以進母食之果愈

按虧體奉親本不可以爲訓在北方猶偶見之出於至誠則可嘗觀江寧府志則婦孺效尤習以成風而不知其傷親心爲甚真宜以爲戒以孝經禮記初無此教也

楊甲科生員善事繼母母有疾禱於神願減己壽益母壽胞弟開科出繼家業漸落甲科將已產並分與之陝西儒生吉臻攜家就食州城病故有勸其妻改適者不從亦不能歸欲自縊甲科母憐其節收之甲科承母意遣人送之歸

趙如錫明忠烈良棟曾孫年四十遊庠性孝友父歿哀毀骨立遺產盡讓其兄學務實行蛙步不苟教授灑令署數年杜絕請託灑令以古人目之

趙琨幼失父母老弟弱琨採山行傭以養十餘歲支軍役軍官奇其狀欲挾之去以母老哀懇乃已有族兄珣充里催以逋累拘囹琨曰吾兄隻身吾不爲營辦幾死累囚矣盡貨其糧蓄贖兄歸兄歿遺一子三女皆幼琨收養於家並爲婚嫁云

水大珠州庠生兄大觀早亡父悲慟不已百方承順以解之父患痿疾晝夜不離左右者三年鄉里欲舉孝行固辭曰孝字談何容易忝列膠庠而以父母要名所不忍也人益重之

水大本性孝友篤於親戚與弟大興析居已久興故諸侄孤幼無依大本復召與同居延師教之各爲婚娶與己子無少異親故不能葬者助之族弟有一產質外人者代爲贖歸知州陳扁表其門

史作羹宏農衛生員明末地畝荒蕪清初歸併賦無定則民以爲苦作羹奔走爲民請命始有定額至今衛人感德歲時祀之

梁士龍歲貢生陝經明末寇亂地畝荒蕪清初民未復業逋賦甚爲民累士龍偕里民史筆記等奔走告哀三載得減原額一萬二千餘兩並除以前逋欠鄉人德之嘗續陝州志使文獻有徵云

孫善修順治十八年土寇圍城州守黃以民夫五百命善修守城善修晝夜巡守二十餘日城賴以無虞

韓 辛歲貢生涉縣訓導致仕後康熙二年歲饑代完貧戶逋課百餘金及歲稔有償債

陝縣志

卷十七

四十三

者輒不受

莫我元樂喜好施妻任氏尤樂助成之康熙十八年淫雨爲災親族不舉火者我元並招而養之任氏無難色任希光莫大顯逋賦莫償我元以三十金代爲完納山西安邑李某病臥道左我元攜至家調治兩月而痊給資糧遣之夫婦壽皆耆耄子孫蕃衍

楊雲程州諸生康熙三十一年疫癘大作南關鎮屬往來孔道死者往往暴露雲程施棺瘞之約十餘人後死者益衆棺不能繼乃多買葦蓆命二子璋璣隨時掩埋凡施蓆六百餘葉至今傳頌不衰

李 芬謝承教並身任州事不計利害州人德之

劉振威賑貧濟乏秦晉人在陝者咸感其德爲立碑於北街龍門口紀其實後爲農官子曰連貢生曰瑋武舉曰琳曰琅暨長孫恕並庠生

莫若廉客山西猗氏縣有李姓因貧鬻女若廉買爲婢業付值矣母子分手時哭甚哀若廉惻然曰吾寧無婢何忍拆人骨肉耶舍之不索其值李固請收還若廉受其半曰留半爲爾家費此女不可鬻矣

張成己康熙三十年大饑施飲食於貧乏者不可勝計後出資建神廟數十間年四十餘

連舉五子壽八十有九知州孟表其門曰達尊有二

按爲善得福出於天理之固然若如所敘不免涉於迷信爲陰隲果報之說則人欲之私而非誠矣

楊 漣吏員康熙六十年大饑施飲食於道旁者二年族侄成龍成鳳貧乏漣周之並爲婚娶子所舉郡庠生

張止仁安貧自守一介不取一家皆化之與叔父母同居事之惟謹弟姒胡早寡止仁厲以操守已雖貧乏而曲爲之謀不使失所以是胡得成其節

賈文煜歲貢生急公好義濟急扶危凡地方收養病旅教督賑饑諸政煜有勞焉其他建考棚督渠工修文廟俱有贊畫巡撫雅登之彰善坊署其門曰公平正直巡道張著曰力行近仁知州龔署曰一方元氣

李春秀薄產僅足自給而好施予自雍正十年至乾隆六年常出穀麥三十石以濟貧民及歲稔償穀者不取息鄉人德之巡撫雅登之彰善錄知州陳著其門曰心存利濟以上龔志

李占魁春秀子性慷慨急人之難綽有父風州守龔旌其門曰敦行不怠
謝承教急公好義有利濟功通志

陝縣志

卷十七

四十四

劉煇拔貢生炤之胞兄也家無升斗年三十不娶課弟炤讀書弟負笈從師河北煇採薪易粟供膏火竭蹶從事館師冀太史特敬重之炤膺康熙己酉選拔尋卒煇復教猶子成立擢明經友愛蓋出於天性云

秦建基居石橋南寨村家無餘資而以利物濟人爲事獨造石橋於街西以便行人時刈草以喂牛馬或煮粥以濟貧困康熙年間知州孟華陰縣任暨學官同時建碑

薛思凱衛守備性仁厚重德義息爭訟助婚葬一時廟宇橋梁多出其手捐資助賑散粟村鄰至今思其德者咸稱爲善人

賈 質乾隆間人解衣推食惠及貧困鄉里稱爲善人入彰善坊子明義善承父志修橋施茶亦好善樂施

楊洪禮於乾隆五十年五月見厥神現形入倉困中後值歲荒洪禮曰神之祐我欲我救此一方人也出粟賑濟門外往來如市自本年春至來歲及麥而止巡撫雅給扁曰周恤貧乏知州陳錫輅表其門曰尙義可風

朱方璫監生樂善好施乾隆年間充趙二里里長適年穀不登合里交糧無幾方璫出己貲悉爲完納里人感之扁其門曰一里稱善子懷道監生克承父志購黑山溝稞租地施

北陽村關帝廟爲香火資又取家所藏借券悉焚之後懷道年六旬連舉二子俱列成均孫三維漢遊泮維棠佾生曾孫九乙光遊泮食餼乙藜亦遊泮僉謂厚德之報薛潤字霑被性和平終身與人無爭嘉慶十二年大饑親族賴以全活者數十家里黨目爲善人

衛元燮道光庚戌進士補四川永甯縣時瘟疫流行元燮捐廉施藥餌捨棺木瘞枯骨諸多善政不可枚舉後七十餘告歸優游林下樂終天年非公事不入城市人稱其介節云白玉珂庠生性慈良貧苦戚族賴以周恤道光二十七年饑饉並臻死亡遍野玉珂慨然出錢穀賑本村饑民日散錢十千穀一石五斗全活甚衆村人稱盛德焉

白玉潤歲貢生性鯁直督責子弟不少寬假謹步趨絕俗好教授生徒成就甚衆巡撫牛扁其門曰孝義清介

張明堂字照亭州同好施予道光丙午丁未間歲遭饑饉明堂出資賑鄉黨之貧乏者光緒三年大饑復捐資助賑又於門前施米濟貧其鄰村之不給者則散錢以周之如是者一年有餘子瑞璽及孫淞同入泮食廩餼淞任內黃縣教諭人謂厚德所致

燕耀西庠生重義輕財親族婚喪無不竭力以助道光二十七年旱荒出粟二十餘石賑

陝縣志

卷十七

四十五

濟貧乏卒後親族以德音不忘額其門

趙元鼎監生四歲失怙七歲時母病虔申祈禱侍湯藥不懈鄉里稱孝道光二十七年旱荒出粟濟村中貧人同治元年寇亂元鼎不顧財產急奉先人畫像及族譜遠避經理敷文書院二十餘年成就後學甚衆壽七十有一

趙海涵增生性耿直有幹才咸豐二年佐州牧邱君創修七里澗源橋並堂鎮東瓦壩溝橋石堆西橋具有條理又精岐黃術活人無算壽六十有五

齊桂家小康親族有不能婚葬者嘗力助之精岐黃術專以濟世爲心不受餽遺咸豐初瘟疫流行桂和藥施人全活無算其他善行尤多難以枚舉

任登鰲監生慷慨樂施無力婚葬者必周恤之咸豐十一年亢旱成災登鰲出粟百十石以濟貧窮子安仁於同治十二年亦賑粟八十餘石又於頭峪鎮西嶺上施義地一畝五分

喬春巖咸豐己未舉人郟縣教諭咸豐十一年捻匪擾郟團練守城生靈賴以全活有自賊中逃出者散錢給之俾歸鄉里累加內閣中書光祿寺署正銜士民建報功祠尸祝之田大本修職郎賦性剛直爲人排難解紛鄉里重之有洛邑客中途被劫大本急率衆追

賊奪還財物給客客具重貲謝固辭不受

李玉堂庠生有知略以利濟爲心同治元年捻逆竄擾料賊必至督衆修熊耳山寨率居人入寨避賊後賊果至以有備不遭蹂躪保全者極多人服其先識

吉來臨生員同治元年捻逆擾境鎮人失業乏食者來臨出財粟賑濟尤精小兒科活嬰兒無算四方感德歿後樹萬人碑以誌之

水生鰲字海客武庠生重氣節好周濟貧乏事親孝奉繼母五十餘年色養無間母嗜瓜市地種之以悅母心既歿營葬建祠盡禮同治元年逆賊犯境生鰲率鄉勇五百守鴈翎關賊不得逞會糧絕七日卒年五十三歲人以急公孝友扁其門

張應乾由廩貢保舉孝廉方正人皆以爲榮應乾不色喜曰若舉當其實何喜之有無其實而竊其名恥孰甚焉又何喜爲後撫豫使者牛親書型方善俗四字以獎之

張宗海同治年間寇亂救人無算光緒十五年施義塚地四畝其義舉大率類是
喬瞻巖監生事繼母以孝聞析產任兄所擇有陳姓不能葬父楊姓不能葬母瞻巖皆出己財以助之鄉里稱善

崔茂南至性過人同治元年父遇賊被裹去茂南冒死至賊營尋父遇之見賊渠泣求免

陝縣志

卷十七

四十六

父願以身代賊感動兩釋之人稱其至孝

尙長祿事父母盡孝有弟分居二十餘年因公負債薄田難償長祿取己之沃土易之無吝色同治初寇氛逼近避難者十室九空長祿以子婦病垂死不忍棄之去賊義之不敢加害生平善舉指不勝屈鄉里稱之

楊鴻霖性至孝父歿母以哀傷致目疾鴻霖侍湯藥頃刻不離左右同治元年屢聞寇警常負母至深山中避亂相依爲命人以爲不可及

趙明朗路拾遺金二百餘兩守視不去瞥見一人入叢林中欲自縊急近前詢之卽失金者舉付之無德色酬以金辭不受失金者感歎給扁而去

趙濟文監生以培植士類爲念見敷文書院久廢出資七百餘串地九十餘畝爲書院經費士林頌德

李大綱性最孝七歲時值年荒舉家外出就食母歿於汝州不能歸骨大綱哀慟不輟及隨父至家日夜號泣十五歲隻身奔赴汝州負骸骨歸葬人大奇之一時學士文人多詠歌其事尤勤學好問精醫理濟世活人鄉里咸推重焉

韓景德生平孝友樂善好施解紛息爭鄉里重之給扁貞惠慈仁

李學粹立身純謹品端學優幼以孝聞設教一方信從甚衆訓二子以義方長元緒列成均光緒三年舉州賑分局公正賑濟貧民無私心次應五早入州庠
趙逢選施醫活人不受餽遺歿後一方立碑頌德

白學智鄉賢繩武之六代孫也性端直好義舉嘗與人排難解紛史劉兩性因買田構釁累世成仇學智力爲勸解和好如初一時村鄰鮮有涉訟者家庭孝友族黨無間言年九十有二無疾而終

白薰有孝行繼母程患癱瘓者五年薰與妻姚氏奉侍湯藥扶持起臥日夜不離左右歿後廬於墓側父歿亦然讀書攻苦迄未得博一衿習堪輿尤精選擇性廉靜物非己有一毫不取鄰里目爲善士子入州庠食廩餼

馬存誠事親至孝終身無間

賀善年撫姪如子摒擋家務三十餘年妻子無私財嘗爲人稱貸人不能償者身任之終不肯負人雖費數百金不恤也

賀天昌附生善年子性至孝母年六旬目盲天昌晝夜扶持二十餘年奉養無間里有訟者嘗以田數畝易金以解之作訓子弟歌及戒爭訟歌立村規立社倉居鄉數十年人皆

陝縣志

卷十七

四十七

化之

賀天賓廉潔寡慾嘗拾銀券一千一百兩訪其人歸之毫無吝色失金者厚酬之辭不受生平所爲多類此

陳玉斨結茅屋數椽賣酒食供行客有客食訖去玉斨歛器具見遺金五百急追客至十餘里外付之客酬以金不顧而還

趙榮宰性好施濟廣見聞一日見鼠吞冰呼四村農人盡收其禾後大雨雹不爲害人稱博物君子

按此靜觀陰陽之理而知其將然凡事皆有朕兆惟在處處留心耳

杜兆太績學未仕精岐黃術專心濟世不受餽遺鄉里重之

李元勳庠生初爲高尚仁義子尙仁後生二子病革泣語勳曰吾聞義子不亂宗可自去指牆下藏銀六百予勳勳泣受之尙仁歿後三年攜妻子去時必哭拜於尙仁之墓數年如一日聞者義之

孫凌雲署登封縣訓導生平重義輕財事不可枚舉有山西質庫負凌雲四千餘金無力償還凌雲卽對衆焚其券此其一事也

王家齊從九品途中拾遺金六十餘兩因大書於壁曰有遺金者向某求之遺金者果至家齊付還之

王志禮監生嘗督修聖廟勞瘁不辭工竣又出己貲購柏樹百餘株及竹數叢種之其急公好義多類此

李鳳閣字東方監生性善好讀書屢試不第通岐黃施藥活人一方被澤歿後口碑猶載道云

水振經急公好義地名石門者爲行旅所必徑路極狹崎嶇險阻下臨深潭時虞顛墜值風雨驟至進退維谷行人苦之振經出財覓工通幽鑿險至雁翎關二十餘里轉陂爲平時有潘楊二姓欲助錢振經謝之曰家產雖費盡不惜也越數年工得告竣其勇於自任如此卒年七十有六

潘履謙持躬端謹教人有法事親至孝父歿母垂老履謙得風疾不能語門生故舊來問疾者履謙輒以手指母垂頭而泣蓋痛其不能終養也有教澤碑

于憲武家素封輕財重義遇負債者不責償憐其艱苦或更資助之不少吝以助餉贍軍巡撫張給扁曰誠篤壺箠

陝縣志

卷十七

四十八

段麟元厚宗族好施予有負麟元債者至數百金不能償麟元輒焚其券人稱盛德

段經元監生經岐黃活人無算不受餽遺人德之扁其門曰義活萬人

段德元從九品事繼母以孝稱

曹榮彪優廩生父年老患癱證榮彪朝夕侍奉不少懈每屎溺時急則以手掬之及歿哀毀幾至滅性教授生徒因材而施成名者甚衆卒後生徒勒碑誌教思焉

楊玉同知光緒三年歲大饑玉出錢穀給貧民全活者甚衆鄉鄰感其德以恩周閭里扁其門

陳鼎新監生重義輕財光緒三年值歲荒有鬻女者鼎新買楊姓女爲婢六年有芮城人遇婢於門相見痛哭蓋女子父也鼎新聞之令其攜女歸且資助之道路稱歎

喬乘淮素性敦樸設藥局濟人貧不計利有負欠者不責償里人感德立碑頌之

喬岳泰施錢粟修橋梁凡諸善舉無不樂爲而有功不居自視欲然也學使俞扁其門善俗型方

喬秋巖屏浮華敦古處全人名節息人爭訟鄉人感德立碑

喬嘉林好善樂施光緒三年歲荒出財粟賑饑民死亡者施地以葬里人立碑頌德焉

白鶴年十四入郡庠事繼母以孝聞母有疾禱於神願以身代精岐黃濟世活人一時推爲國手村有李姓者貧不能婚鶴出己財爲之完娶親族鄉里受其惠者不可勝計以善士稱壽九十四歲而終

薛克誥字周書讀書日十行下尤熟於孝經內則早失恃年十五歲值父病衣不解帶親侍湯藥必嘗而後進及歿哀毀幾至滅性葬畢廬墓側三年事繼母愉色婉容出告反面卽有急事終不違定省妻霍氏亦賢孝飲食侍奉未嘗不如姑意昆弟宗族咸稱之治家嚴肅有法子四列膠庠者二克誥病子思藩禱以身代亦衣不解帶數十日如克誥侍父病然

王文炳庠生以筆耕爲業父年七十餘患癱證文炳遂杜門不出親侍湯藥扶持抑搔躬滌溺器六七年無間里黨稱孝

薛東周守備大成子性質樸篤孝友年十二失恃朝夕隨父寢處旣冠猶不忍離後父患癱症三年不入妻室奉湯藥扶掖起臥不少懈及病篤屎溺悉手掬之宗族稱孝焉

曹秉元吏員年老無子散財施德以田二頃四十畝分贍族人後生子成立年七十有二終焉

陝縣志

卷十七

四十九

王振畿性至孝母卒哀毀幾於滅性及事繼母致敬盡禮人無間言尤樂施予鄉里被其惠者甚多

水懷琦弟懷金有罪被囚母晝夜涕泣懷琦遂以身贖弟有司憐其孝釋之以孝友可風表其門

朱夢筆監生早失怙竭力事母友于兄弟一日晨起拾史某糧銀十三兩急訪其人付之絲毫不取人以爲難

趙治宰暮夜拾遺橐囊中物值百金訪其人還之無難色有司扁其門曰孝義可風

特其次序錯亂多所更正

以上趙志

張清霖字雨珊會興鎮人清庠生中年以經商致饒裕爲人循循儒雅無市儈氣與人交無貴賤皆接以禮以故鄉里稱善士宣統初元被選爲孝廉方正賜給六品頂戴年七十

三以民國十八年卒鄉里送葬者數千人

申治策字安民申家窳人清武庠生幼嫻弓馬遊泮後務躬耕以勤儉致富饒晚年樂善好施遇鄉人貧困者輒周濟不求償或有借貸貧無力償者則面焚其券以故鄉人額其門曰重義輕財德比孟嘗此所謂富好行其德者也

辛召棠東樊村人清附生以醫術名於時民國戊午歲瘟疫流行召棠獨運心機參以醫理爲人診治無不藥到病除一時里人賴全活者無算著有醫學一得稿散軼

秦清真字雅堂北陽村人性豪放不拘小節平時仗義疏財鄉里有假貸者輒與之而不責償清同治元年流賊猖獗倡議修寨捐錢三百仟光緒三年歲稔散粟十五石以賑貧乏鄉人賴以存活者無算

朱朝塘字煥堂清千總賞戴花翎性純孝弟朝鏡官河東朝塘留家侍親且爲地方建社倉以備荒年修渠道以興水利入民國充清鄉局長一切開支皆出家財以供之

朱朝銘字敬堂朝塘朝鏡之弟也清庠生性友愛赴河東省兄值大雪衣服單薄不勝其寒遂中道凍死

水坤章字子文南陽村人幼失怙未幾母亦相繼歿是時坤章有兩弟皆幼撫之如子家徒四壁坤章率兩弟佃田供耕後稍裕置田買屋爲弟婚娶壽八旬有幾卒

水允寧字安之事繼母以孝聞平時赴集鎮爲母備甘旨雖騎牲必以身負之相傳謁金頂山爲母祈壽先期神示夢主僧曰某月日有河南陝州孝子水允寧來山燒香汝可好待之及期允寧至主僧問其何來答從陝州來主僧曰汝乃水允寧乎允寧驚曰汝何知

陝縣志

卷十七

五十

之主僧以所夢告於是相攜入寺洗沐參神已而導參二百餘歲之老方丈方丈點首曰汝家有活佛何必遠來此允寧請活佛之狀曰著草帽雨衣者卽是也允寧不解抵家適大雨急叩扉母著草帽雨衣出開門允寧一見大悟始知所言活佛卽母由是不復外出倍加孝敬至今鄉人播爲美談云

員鳳瑞性孝友事母曲盡子道備甘旨承色笑數十年如一日後母病失明手足不仁動需人扶鳳瑞晨昏不離側爲拭淚揮涕疏裹足以及便溺污穢之役皆鳳瑞親爲之以至於終而後已

高雲漢字天章關上村人清廩生性活淡寡言笑與人無忤弟雲瑞字正卿入郡庠爲人和靄可親言動以禮凡皆設帳鄉里數十年桃李滿門民十幾年月土匪入其村雲漢兄弟均被擄兩人不相見雲瑞得脫旣而思曰不見吾兄寧獨歸乎復往尋旣見被執同死匪窟越時其子尋屍歸葬里人哀之門生戚友爲樹碑以誌悼云

按雲瑞旣脫於險而復以尋兄同死匪窟心則善矣而未免於愚所謂從井救人者也君子不以爲然

朱清泉字廉溪菜園鎮人昆仲三人清泉居次十七歲失怙父病革時遺囑其兄好劍術

而弟習文學全家食指幾三十口田產僅數畝不善經營則不免凍餒全賴孤身支持耳時值歲饑清泉念父之命賈勇竭力以販麵爲生理不避風霜戴星披月時往來於磁鍾張茅間外博贏餘內持樽節漸以致富至革命軍起秩序不靖卽析其產業令子姪自謀生活以免積財之累最喜接交學士性情直爽爲鄉里排難解紛片言立決以信義素孚於人也共和初年被選爲區參事會長繼充保衛團長所住毗接山麓頻年匪衆蜂屯蟻聚不可爬梳清泉訓練壯丁嚴密勦捕地方籍以寧謐以民國十六年遭疾卒年六旬有六子三次子喚民由河南農業專門學校畢業又從靈寶張孝廉象明學現充閿鄉第三區區長廉幹有爲足貽其親令名矣

張金鏡字旭堂縣城內人愈聚之裔孫也旭堂能繼祖業讀書爲文中光緒癸巳舉人負地方重望常辦理公益事業屢推爲商會領袖恤商艱解困苦迄今商民感德稱道弗衰民國十四年代理本縣縣長時戎馬倥傯兵差絡繹旭堂居間應變軍民兩洽晚年又復被推爲商會會長辭不獲已凡地方大事得先生一言而決平生訥於語言常恂恂若不能出諸口與人無忤人無不當意者民國十有幾年卒於家邑人痛失老成咸悲悼不置云子克家以醫名濟人利物以繼父志

陝縣志

卷十七

五十一

王登墀字子丹樊村人父增瑞以學行負鄉望登墀少承庭訓學有淵源光緒某年入邑庠改革後曾膺陝縣公款局局長稱廉能家居熱心公益善以歧黃濟人外科尤精鄉人利賴者甚衆晚年提倡教育尤力嘗出貲創設樊村育英學校充校長數年能以身作則成績爲陝縣最專員歐陽珍屢褒獎之民國二十五年一月以勞致疾卒於家享年六十三歲士林爲之哀悼子道正從軍政有年歷任龍關宣化縣長有令名家聲日益光大云

僑寓附

按不必生於此土或宦遊偶至而因棲居焉苟其爲名賢亦地方之光也舊志有僑寓傳今仍其例附人物後云

隱者焦先高士傳曰世莫知先所出或言生乎漢末自陝居太陽無父母兄弟妻子見漢室衰乃自絕不言及魏受禪常結草爲廬於河之湄獨止其中冬夏恆不著衣臥不設席又無草蓐以身親土其體垢汗皆如泥漆五形盡露不行人間或數日一食欲食則爲人賃作人以衣衣之乃使限功受直足得一食輒去人欲多與終不肯取亦有數日不食時行不由邪徑目不與女子逆視未嘗言雖有驚急不與人語遺以食物皆不受河東太守杜恕嘗以衣服迎見而不與語司馬景王聞而使安定太守董經因事過視又不肯語經

以爲大賢其後野火燒其廬先因露寢遭冬雪大至先祖臥不移人以爲死就視知生不以爲病人莫能審其意度年可百歲餘乃卒

張庭堅字才叔廣安軍人初在蔡京幕府京還欲引爲已用先令人諭意庭堅不往京大恨列諸黨籍編管虢州終著作郎

趙偉解州人徙居陝之西樊社鄉寇竊發偉倡義興兵追賊保障鄉閭事聞授陝虢二州長官

張橘字南宮洛陽人康熙甲子科舉人主講陝之鷄足山學者翕然宗之有依仁輔仁兩社會約沐其教者爭用力於學後任商邱教諭學田所入儲之學宮不入私橐卒官士民立碑志德生平著述甚富子二長翊遠次務遠洛庠生皆好學力行州守表其門曰敦倫飭紀

陶時咸字受人浙江會稽陶家堰人乾嘉間移廣陵習刑名錢穀之學不屑屑於生產作業然每以賓禮自重常據案代師治文書自朝至暮未休博奕飲酒人以爲通脫者輒斥去謂鬻文爲活不可有寒乞相蓋食饒梁肉矣詎肯梁肉外再計肥甘乎每恨不得及時展所長同儕以事相屬不竭其力不止嗣隨某官佐治陝州見其地民風樸質士大夫以

陝縣志

卷十七

五十二

骨鯁相砥遂家焉與于天爵交最摯望衡對宇晨夕過從道光中時咸與妻莊氏俱先後歿於陝其子尙增年幼醫藥喪葬多賴于天爵關照其墓在東門外上官村南于家後人每爲掃祭累世不替尙增字鶴坪性剛毅孤介既渴葬父母於陝又單騎冒風雪往尋其亡兄之匱於魯山城東運歸葬父母塋次豎石爲誌後亦遊幕豫省居開封馬府坑街家庭肅穆子孫秀起尙增子二人應達同治甲子科河南鄉試舉人已丑大挑二等新野縣教諭次應運候選布政司理問孫二人瑞徵光緒丙子科舉人國史館議敘知縣息縣教諭次福徵從九品曾孫五人鍾翰癸卯科舉人毓翰縣學生嗚呼世多言居刑幕者損陰鷲觀時咸當年貧困客死而其後累葉科第聯綿均以學行顯非積蔭之厚能若是乎顏芝蘭字會芳原籍洛寧民國十七年寓居陝縣陳村歷任國民革命軍第十二軍第一師長入陝籍後解甲歸田與向日友朋不通往來惟以耕耘爲生介胄中高人也

陝縣志第五冊勘誤表

卷數	頁數	行數	正	誤
十七	二	十四	「皇后」	誤爲「黃后」
		二一	「雋州」	誤爲「雋州」
	三	二	「淫刑」	誤爲「淫刑」
	四	二四	「朽壤」	誤爲「朽壤」
	五	一	「噬証」	誤爲「噬証」
	九	十一	「雅尊」	誤爲「稚尊」
		十二	「迴國」	誤爲「迴國」
	十	二三	「迴與」	誤爲「迴與」
		十三	「舟人」	誤爲「舟人」
	十四	六	「鍾王」	誤爲「鐘王」
		八	「仕宦」	誤爲「仕宦」
	十七	十一	「賦性」	誤爲「賦行」
	十八	十八	「己亥」	誤爲「己亥」
		二七	「己未」	誤爲「己未」
	二十	一	「爲己」	誤爲「爲己」
		三	「己未」	誤爲「己未」
		十三	「性迂」	誤爲「非迂」
	二一	六	「批卻」	誤爲「批卻」
		二五	「己丑」	誤爲「己丑」

頁數	行數	正	誤
二二	七	「幾釀」	誤爲「幾讓」
	九	「爲己」	誤爲「爲己」
	十	「綱常」	誤爲「剛常」
	十四	「晝夜」	誤爲「晝夜」
	二五	「字銘」	誤爲「子銘」
	二二	「已而」	誤爲「己而」
	十一	「經制」	誤爲「荆制」
	十	「徒欲」	誤爲「徒於」
	十五	「催印」	誤爲「摧印」
	二十	「毒痛」	誤爲「毒痛」
	十九	「瑩樹」	誤爲「瑩樹」
	四二	「跬步」	誤爲「蛙步」
	四七	「兩姓」	誤爲「兩性」
	四八	「必經」	誤爲「必徑」
	七	「精」	誤爲「經」
	十六	「恬淡」	誤爲「活淡」
	二二	「爲己」	誤爲「爲己」
	三	「己丑」	誤爲「己丑」
	十九	「己丑」	誤爲「己丑」

